

عملیات نو  
حرف و خط

لبن .. ما تخرش  
نخالص .. وابلسم  
مصو

يا خسارة  
زعمان السجائر  
للى في جيبه ابتليت  
شاوشى

يحول إلى الإدارة العامة للغرف موظفان

ولا يرقى  
ما عمل لك  
تحقيق ١٥  
وصفة او فيات  
صحي

بلدياتي وعافهم  
ولادكبي.. يشكو  
من أقل حاجة  
عمدة

حضرت غرق  
بعد مواعيد  
الفرق الرسمية  
وموظف ثالث

الطلب دم  
ناقص  
ورقة  
رمغة  
موظف



عز ساس

اهداءات ٢٠٠١

١. صلاح راتب

القاهرة

# عملية نوح

على سالم



الفلاف  
الفنان بهجت



بدأت تلح على فكرة مسرحيتي في نهاية عام ١٩٧٢ ، عندما بدأ  
يتملكني الإحساس بأننا في طريقنا للتحلل والضياع والفرق ، وأقول  
بصدق شديد أن كل ما كان يحدث حولي ، لم يكن يوحى بأنه ستكون  
هناك معركة ما . .

وهناك تكن عبقرية أنور السادات ، لقد مهد للعمليات العسكرية  
بخطة شديدة الإتقان من الخداع العام ، أقنعت العدو والصديق على حد  
سواء بأن الحرب أمر بعيد . .

ثم ضرب ضربته . .

وبذلك أنقذ مصر من الفرق . . وهذه هي - ببساطة - فكرة  
مسرحيتي . لقد كان قرار القتال قراراً شجاعاً ، وأشجع منه كان قرار  
السلام ، لأن الحرب لم تكن يوماً ، هدفًا في حد ذاتها ، ولكنها كانت ،  
ويجب أن تكون ، وسيلة من أجل السلام . .

بقى أن نفهم جميعاً أن هؤلاء الذين ماتوا أو فقدوا أجزاء غالية  
من أجسامهم على أرض سيناء ، لم يموتوا من أجل استعادة الأرض فقط ،  
لقد ضحوا بحياتهم من أجل أن نحيا نحن حياة أفضل .. من أجل أن نحيا  
في مصر نظيفة : مصر الحرة والديموقراطية والكبرياء . . ومن هنا

كانت حرية التعبير وإغلاق المعتقلات وسيادة القانون ، أمراً حتمياً ..  
وسوف يكون من الخيانة هؤلاء الشرفاء الذين ماتوا .. أن نخسر معركتنا  
هنا في شوارع المدينة .. ضد التخلف والجهل والبيروقراطية ..

إلى أخى أحمد وزملائه الذين أنقذونا من النرق ..

إلى هؤلاء الذين دفعوا بموتهم ثمن أن نحيا ، إلى أطهر وأشرف  
من أنجبت أرضنا .. إليهم جميعاً .. أهدى مسرحيتي ..

على سنالم



## الفصل الأول



## المشهد الأول

(قاعة المجلس الشعبى لمحافظة مصر كما يسميها الناس،  
أو محافظة القاهرة كما تسمى عادة في المكاتبات الرسمية،  
بعض مثل الهيئات يجلسون بينما يتوافد باقي الأعضاء ..  
يتبادلون التحية بأشارات وقورة لا تخلو من تكلف ..  
كما يتبادلون أحاديثاً هادئة تلفها ابتسامات مصقولة ..  
الحديث يتناثر في القاعة . . . . . ولا أهمية كبيرة في  
بداية المسرحية لمرفة هوية المتكلم ، الحديث التالى  
يدور بين مسئول كبير ومسئول صغير . . المسئول  
الصغير في تنغالب هو مدير الاحتفالات)

- المسئول الصغير : أهلا باسعادة البيه ..  
المسئول الكبير : أهلا بيلك ياعزيزى ..  
م . الصغير : سيادتك يافندم ، كنت رائع امبارح ..  
م . الكبير : أشكرك ..  
م . الصغير : حقيقى يافندم . . . حضرتك امبارح لخصت  
الموضوع ببساطة شديدة جدا ، وبطريقة  
مقنعة تماما ..  
م . الكبير : أشكرك ياعزيزى . . . اصل ..  
م . الصغير : ( بحفاوة مبالغ فيها ) .. والله يافندم ..  
بالرغم انه كان عندى شغل مهم امبارح في

المكتب ، الا انى كنت حريص انى اخذ معايا  
التليفزيون الترانزيستور .. عشان اشوف  
سيادتك ..

م . الكبير : ( وقد بدأ يتضايق ) .. اشكرك .. الواقع  
أنك بتجاملنى أكثر من اللازم ( يحاول تغيير  
مجرى الحديث ) .. هو .. هو .. هو التليفزيون  
الترانزيستور ده بكلم ...

م . الصغير : والله يافندم ... أنا جبته رخيص جداً من  
السوق الحرة ... واحنا راجعين من ندوة  
الأشتراكيين فى فرنسا ... وجاى لى واحد  
تانى لو تحب سيادتك أبعتهولك .. هو ثمنه  
تقريباً ثلاثة جنيه وسبعين قرش ..

م . الكبير : شكرا يا أخى ... شكرا جزيلا ..  
م . الصغير : حقيقى يافندم والله .. كلامك امبارح ، وده  
مش رأى لوحدى .. أنا سألت ناس كتير من  
اللى شافوك امبارح .. ناس عاديين ، من  
البسطاء دول ، اللى هم بيمثلوا فى مجموعهم  
شعبنا المناضل .. كلهم اجمعوا أن حديث  
حضرتك فى التليفزيون امبارح .. كان ..  
كان .. أكثر من رائع ..

م . الكبير : عزيزى .. أنا .. أنا ما تكلمتش فى التليفزيون  
امبارح ..

م . الصغير : ( باضطراب شديد ) .. ازاي يافندم .. هو  
مش كان فيه برنامج مع سعادتك امبارح  
الساعة سبعة ونص على الهوا .. ده معلن عنه  
فى كل الجرايد ..

م . الكبير : فعلا .. بس أنا مارحتش ... أنا معاندش

عربية .. وما تمكنتش انى اروح التلفزيون  
فى ميعادى ..

: آه .. يبقى برنامج قديم يافندم .. وبيعوده ..

: ( متهربا ) .. جاز ..

: لكن حقيقى يافندم .. كلامك امبارح ..

: ( يمنع نفسه من الانفجار ) .. أرجوك

ياعزيزى .. أرجوك .. أرجوك .. أنا عمرى

ما تكلمت فى التلفزيون فى حياتى .. لسه

برضه مصر انك شفتنى امبارح فى التلفزيون ..

: ( يكاد يغمى عليه ) الواقع يافندم .. الظاهر

التلفزيون بتاعنا .. يعنى .. الشاشة

بتاعته .. ( يلوح بشخصية مهمة تدخل

القاعة فيهرع للاقاتها ) .. عن اذنك يافندم

( يصفح الداخل بحرارة شديدة )

: أهلا يافندم .. الف مبروك يافندم ..

ياريت يافندم كنت جيت بنفسك تشوف الناس

البسطاء امبارح .. وهم بيرقصوا لما عرفوا

أن سعادتك حاتمك المؤسسة ..

الشخصية المهمة : ما هو أنا ماسكها من شهرين .. الخبر الى

نزل فى الجرايد النهارده .. خبر قديم ..

: ( باعجاب شديد ) .. ياسلام .. ياسلام ..

بقى الناس الى أنا شفتها فرحانة ، بترقص

عشان تعيين سيادتك .. بيرقصوا بقالهم

شهرين .. دى حاجة عظيمة فعلا .. عن

اذنك يافندم ..

( يبتعد ليقابل أحد الداخلين )

( الحوار التالى يدور بين المسئول أ .. والممثل ب )

م . الصغير

م . الكبير

م . الصغير

م . الكبير

م . الصغير

م . الصغير

م . الصغير

- ١ : تصور ... بلغت بيهم الصفاقة انهم يختلسوا  
من المشروع خمسين ألف جنيه ..
- ب : أعوذ بالله ..
- ١ : ما سكتش طبعا ... بلغت النيابة ... كل  
موظفى المشروع دخلوا السجن امبارح ..
- ب : وبعدين ..
- ١ : خرجوا النهاردة ، بكفالة ..
- ب : دول ناس مجرمين .. يختلسوا خمسين ألف  
جنيه ، من مشروع صغير زى ده .. هنى  
ميزانية المشروع كام .. ؟
- ١ : واحد وخمسين ألف ..
- ب : يعنى سابوا لك ألف فى المشروع .. ؟
- ١ : كانوا حايلخدوه هو راخر .. بس أنا لحقته  
منهم على آخر لحظة .. الخطير يامحسن بك  
انهم مش حرامية وبس ... بل وفاقدى  
الأخلاق أيضا ..
- ب : أعوذ بالله ...
- ١ : ما يشوفوش حديحيا فى سعة من الرزق .. الا  
ويحقدوا عليه .. يتقولوا عليه .. ويحاولوا  
تلويث سمعته .. تصور أنهم بيتقولوا على  
أنا ..
- ب : مش معقول ..
- ١ : والله العظيم .. تصور .. يقولوا العمارة  
اللى فى كامب شيزار اشتراها منين .. والعمارة  
اللى فى السيدة زينب بناها ازاي .. والثلاث  
عربيات اللى عنده ، جابهم منين .. والفيلا  
اللى فى المعجمى .. عارفها حضرتك طبعا ..

الفيلة الصغيرة اللي أنا عزمك فيها الصيف  
اللي فات ..

ب : أيوه .. عارفها .. مالها .. ؟  
ا : برضه جابوا سيرتها في التحقيق .. تصور ..  
عاوزين يجيبوا رجلى .

ب : اما مجرمين صحيح ..  
ا : بس مع مين .. كل الحاجات دى باسم  
مراتى ..

( العبارات التالية تتناثر في القاعة )

..... : هو ميعاده الساعة كام .. ؟  
..... : اتناشر بالظبط ... اتناشر الا خمسة  
دلوقت تقريبا ..

..... : تفتكر انه جاي بخصوص الدفاع الشعبى ... ؟  
..... : جايز .. بس احنا عمرنا ما سمعنا عنه ..  
هو صحيح عضو اللجنة المركزية .

..... : أيوه ..  
..... : ده شخص غريب جدا .. اسمه نوح .. نوح  
محمد على ... عمره ما طلع اسمه في  
الجرايد .. وعمره ما تنشر له صورة ..  
ومع ذلك يقال انه شخص مهم جدا ...

..... : الظاهر المسألة خطيرة ... لى صديق في  
المجلس الشعبى في بنى سويف .. سافر  
النهادة الصبح ، لأن عندهم اجتماع مهم  
الساعة اتناشر برضه ..

..... : وأسيوط كمان ... الظاهر المسألة على  
مستوى الجمهورية ..

- ..... : أكيد فيه حرب ..
- ( الحديث التالي يدور بين المسئول - والممثل د  
وبجوارهما مجلس توحيد وهو شاب وسيم في الثلاثينيات )
- ح : اللي يقرأ المقال بتاع امبارح ... يتأكد ان  
مفيش حرب ..
- د : آه يا أخى .. قرينه .. ده وصف خط بارليف  
بطريقة تؤكد ان التحصينات اللي عاملينها ..  
ولا الشياطين تعرف تقتحمها ...
- توحيد : الشياطين جاز ما تصرفش ... فى الحالة  
دى يمكن البنى آدميين تعرف ..
- ح : يا ابنى العبور خسايه فظيعة ..
- توحيد : ومكاسبه ... ؟ حضرتك فكرت فى مكاسبه .. ؟
- د : يعنى ممكن يحصل مذبحه للجيش المصرى ..
- توحيد : أحسن من المذبحه اللي حاتحصل للشعب  
كله .. لو ظل الموقف على ما هو عليه ...
- د : المسألة مش مسألة شعارات .. مش الفاظ  
منمقة .. ( يلتفت لزميله ) .. الافندى ده  
مين ... ؟
- ح : ده شخص رزل قوى ... اسمه توحيد ..
- مهندس معمارى .. معاه دكتوراه من  
أمريكا ..
- د : يسارى ... ؟
- ح : هو زى ما تقول كده .. شيوعى يمينى ..  
أو بالتحديد هو من وسط يمين اليسار ..
- عارف انت النوع ده ..
- د : أبوه ... بيبقى رزل قوى .. ( يلتفت لتوحيد )  
.. بس أنا ما تشرفتش بمعرفة حضرتك ..



- توحيد** : دكتور مهندس توحيد المصرى .. والمعلومات الى قالها لك البيه .. مش دقيقة قوى .. أنا اتسجنت مرة مع الشيوعيين .. وما كنتش شيوعى .. واتسجنت مرة مع الاخوان ... وما كنتش من الاخوان ..
- د** : حاجة غريبة جدا .. ليه ؟
- توحيد** : زى البيه ما قال لك .. رزل .. ياسعادة البيه . المسألة مش غريبة ولا حاجة .. اى شاب فى سنى .. يا اتسجن .. يا اما كان حا يتسجن .
- د** : مفيش داعى للتشاؤم ده .. صحيح انت حطك كان وحش .. بس مش هى دى القاعدة .. احنا فى أسرنا شباب كثير جدا .. من سنك .. ومع ذلك ما حصلهمش حاجة ..
- توحيد** : ولا حا يحصل لهم .. عائلة عبد الحاكم ، مشهورة جدا .. أنا أعرف شباب كثير منهم أعرف على عبد الحاكم ومجدى عبد الحاكم .. وابراهيم عبد الحاكم ..
- د** : كانوا معاك فى الدراسة ... ؟
- توحيد** : لا .. كانوا معايا فى المعتقل ... ظباط على شاورشية .. ولما خرجت من المعتقل .. كانوا برضه ما سكنوا المؤسسات الى اشتغلت فيها ..
- د** : وحضرتك ... يعنى .. قصدى .. ؟
- توحيد** : انا عارف يافندم من الاول ، أن حضرتك نفسك تسألنى عن مذهبى السياسى ..
- د** : اذا ما كانش يضايقك ..

## توحيد

: ( يحق في وجهه لحظة ) ... أنا معجب

بأخواتون ..

: ( يلتفت لزميله هامسا ) ... معجب

بأخواتون .. أخواتون ده مين ..

: واضح من اسمه انه فيلسوف صينى ..

مش قلت لك من الاول أنه شخص رزل ..

العالم دول يموتوا في الفكر المستورد ..

( يدخل نوح ، وهو شاب في الثلاثينات ، يملو

وجهه ذلك النوع من الاكتئاب الذى يصاحب في

العادة أصحاب المسئوليات الكبيرة ... صوته هادئ

وأسر .. يحمل في يده حقيبة متوسطة الحجم ، وشاشة

عرض سينمائي صغيرة ملفوفة على حامل ، يتجه على

الفور إلى المنصة .. )

## نوح

: السادة أعضاء المجلس الشعبى لمحافظة

مصر .. أقصد محافظة القاهرة ، السلام

عليكم ورحمة الله .. ( ينظر في ساعته ) ..

المفروض أن اجتماعنا يبدأ الساعة اثنا عشر

بالظبط .. فاضل دقيقتين .. ولذلك

حانت هز الفرصة دى .. ونتعرف على

بعض .. أنا نوح محمد على عضو اللجنة

المركزية ..

( كل منهم يقدم نفسه وهو جالس بإشارة خفيفة من

يده أو رأسه )

: فلان الفلانى .. مدير التعليم ..

: فلانى الفلانى .. مدير المواصلات ..

: فلانى الفلانى .. مدير التموين ..

: فلانى الفلانى .. مدير الاسكان ..

....

....

....

....

- .... : اللواء فلان الفلانى .. مدير الأمن ..
- .... : فلان الفلانى .. مدير الدفاع المدنى ..
- .... : فلان الفلانى .. مدير الثقافة والفن ..
- .... : فلان الفلانى .. مدير الأوقاف والشئون الدينية ..
- .... : فلان الفلانى .. مدير الاعلام ..
- .... : فلان الفلانى .. مدير الخزنة العمومية ..
- .... : دكتور فلان الفلانى .. مدير الصحة ..
- .... : فلان .. سكرتير المجلس ..
- توحيد : توحيد المصرى ... مهندس معمارى ..
- نوح : ( ينظر فى ساعته ) .. اتناشر بالظبط .. وفى نفس اللحظة دى .. لى زملاء فى كل المجالس الشعبية لحافظات الجمهورية .. يطرحوا نفس الموضوع اللى حاتكلم فيه مع حضراتكم ... وهو أمر هام وخطير .. بل يمثل أعلى درجات الخطورة والأهمية والسرية .. وقبل أن نخرج جميعا من هذا المكان . سنقسم بالحفاظ على سريته . على المصحف . والانجيل .. والمسندس ..
- ( يخرج من حقيبته المسدس والكتايبين المقدسين وبعضهما على المنصة )
- .. وأيضا .. اجد انه من الضرورى أن تعلموا ... أن أى كلمة ستترتب مما سيدور فى هذا الاجتماع .. أنا بشخصيا مكلف بأعداد من يقلها ومن يسمعها ..
- سكرتير الجلسة : ( يقف مرتعدا ) .. لو سمحت يافندم ..

- نوح  
السكرتير
- : لحظة من فضلك .. لما أخلص كلامي ..  
: أرجوك . أرجوك .. قبل ما تخلص كلامك ..  
لو سمحت ..  
: اتفضل ..
- نوح  
السكرتير
- : ... يافندم . أنا مش سكرتير المجلس ..  
: إمال انت ايه ... ؟  
: أنا القائم بأعمال السكرتير .. سكرتير  
الجلسة الأصلية في إجازة ..  
: خلاص ... انت ألى حاسجل وقائع  
الجلسة ..
- نوح  
السكرتير
- : أنا يافندم عمري ما شتفلت في حاجة مهمة  
ولا سرية ..  
: يبقى المرة دي حاشتغل في حاجة مهمة  
وسرية ..
- نوح  
السكرتير
- : أرجوك يافندم .. بلاش أنا .. المفروض أن  
السكرتير الأصلي ..  
: من فضلك أقعد . بلاش تفرقنا في شكليات ..  
: مش شكليات يافندم .. المسألة أخطر من كده  
.. أنا طول عمري باشتغل في الإدارة الفنية  
في المحافظة .. يعنى فنان .. وانت عارف  
الفنانين .. أنا عارف نفسى كويس .. أنا عمري  
ما احتفظت بسر .. ده أنا باتكلم وأنا نايم يا  
فندم .. فيه ناس كده .. لا يصلحون لاي  
سرية . وأنا واحد منهم .. أنا راجل ماشي جانب  
الحيط وكافى خيرى شري طول عمري ..  
مفيش داعى انضرب بالنار فى الآخر .. لمجرد  
ان واحد خد إجازة وأنا اشتغلط مطرحة ..

أرجوك يافندم قبل ما ندخل في الجد .. اسمح  
لى أنا استأذن .. وأنا أجيب لك حد من اللي  
بيشتغلوا في الحاجات المهمة دى ..

نوح

: من فضلك أقعد .. انت دلوقت عرفت جزء من  
سر الاجتماع .. خليك راجل وتحمل  
مسئوليتك ..

السكرتير

: يافندم أنا لسه ما عرفتش حاجة خالص ..  
هو حضرتك لسه قلت حاجة .. ؟

نوح

: على الأقل عرفت أن فيه اجتماع خطر تم  
الساعة اتناشر على مستوى الجمهورية ..  
من فضلك أقعد .. وتأكد ، لو تسربت  
كلمة واحدة عن طريقك انت .. أنا حاخليك  
تندم على اليوم اللي اتولدت فيه .. اتفضل ..

السكرتير

: ( على وشك البكاء ) .. يافندم كل اللي قاعدين  
هنا ناس كبار جدا ... وكلهم لهم شهر ..  
أنا الوحيد هنا اللي غلبان قوى .. لوحد فيهم  
اتكلم .. أنا اللي حاروح في داهية ..

نوح

: اتفضل أقعد ..

( سكرتير الجلسة يأتى بحركة ثم على الياأس ، ينظر  
حوله كأنه يستنجد بأحد ما .. ثم يجلس )  
( نوح يفرد شاشة السيما الصغيرة على الحامل ويخرج  
من الحقيبة بروجكتر ، يضع فيه شريحة ملونة ويفضيؤه ،  
في الوقت الذى تخفت فيه الإضاءة على المسرح ، تظهر  
على الشاشة الصغيرة خريطة ملونة لوجه بحرى . نوح  
يشرح على الخريطة بمؤشر صغير . )

## نوح

: زى ما حضراتكم شايفين .. دى خريطة وجه  
بحرى .. دلنا النيل .. الشاطئ الشمالى  
لمصر .. فى السنوات الأخيرة ، لا حظنا أن  
الشاطئ هنا .. ( يشير لشاطئ البحر شمال  
الدلتا ) .. بتتاكل بمعدل أكثر من المعدل  
الطبيعى .. وأن مياه البحر . أصبحت بتاكل  
أجزاء كثير من الشاطئ ..

## مدير الاسكان نوح

: لأن مفيض طمى .. لأن السد العالى ..  
من فضلك ما تقاطعنيش ... فعلا كنا  
متصورين أن هذا التآكل كان يحدث بسبب  
انعدام الطمى عند مصبات النيل فى فرعى  
دمياط ورشيد ولكن بمزيد من الدراسة ..  
اتضح أن السبب غير كده خالص .. ( يشير  
لياه البحر ) .. اتضح أن فى المنطقة دى ..  
وعلى بعد مائة كيلو على وجه التحديد ...  
حصل عدة هزأت أرضية تحت المايه .. نتج  
عنها تشققات فى قاع البحر .. تحولت بعد  
ذلك الى ما يشبه الأخدود الصغير ..  
.. الأخدود ده بيتسع .. وبيتمدد فى اتجاه  
الوادى .. وادى النيل .. الأخدود فى  
اتجاهه لأرض الوادى فعلا .. سرعته غير  
منتظمة ... ولذلك ما نعرفش حايوصل  
لنا امتى على وجه التحديد .. ولكن ... فى  
تقدير الخبراء .. أن المنطقة اللى حايصلها  
الأخدود .. هى دى .  
( يغير الشريحة الملونة ، فتظهر صورة وادى النيل كله  
وقد ظلت باللون الأسود .. يطفىء البروجكتر . إضاءة  
المرح تعود لطبيعتها )

- سكرتي الجلسة : (هامسا في رعب) .. يعنى مصر كلها .. حا ..  
 نوح : أبوه .. كمل .. قلها ..  
 السكرتي : أقولها .. ؟ .. أنا ما قدرش حتى أتصورها ..  
 وما اعتقدش فيه مصرى بقدر يتصورها ..  
 نوح : للأسف اللي باقوله صحيح .. ومبنى على  
 تقديرات علمية سليمة تماما .. هى دى المشكلة  
 اللي أنا جاي أعرضها على حضراتكم النهاردة ..  
 ( سكون وصمت يشلان كل الموجودين لعدة ثوان )  
 : وايه موقف الاتحاد السوفيتى .. ؟ ..  
 : موقفه من إيه ؟  
 : موقفه من المصيبة دى .. ؟  
 مدير الثقافة :  
 نوح :  
 : الظاهر حضرتك ما فهمتش كلامى .. احنا  
 اللي حانفرق . مش الاتحاد السوفيتى ..  
 : ( يفقد أعصابه ) .. ما قلنا لكم من الأول أن  
 الاتحاد السوفيتى ده منيل ..  
 توحيد : ( محاولا تهدئته ) .. عزيزى . المسألة اكبر  
 من الاتحاد السوفيتى والاتحاد الأمريكانى ..  
 انت متصور الاتحاد السوفيتى ممكن يعمل  
 لنا إيه بالظبط . ؟  
 مدير الثقافة : ( صارخا فيه ) .. اسكت انت ما تتكلمش ..  
 أخرس خالص .. مانت زيهم .. انت منهم ..  
 أنا عارفك كويس .. اسكتوا يا ولاد الكلب ..  
 ضيعتونا ..  
 ( توحيد يحاول الرد .. ولكنه يسكت فجأة ويطلق  
 برأسه إلى الأرض فى حزن )  
 : أستاذ فلان الفلانى .. حضرتك ممكن تهدأ  
 وتقعد .. حاسمك لما أخلى كلامى ..  
 نوح :

( يجلس وهو يمشي بعرض الكلمات غير المفهومة )

**مدير الاوقاف :** ( يهيب صارخا ) .. من الكفر .. من الافتراء ..  
العالم كفرت .. الناس افترت .. شوف  
الستات ما شيين ازاي في الشوارع .. نص  
جسمهم عريان .. شوفوا الافلام .. الافلام  
كلها بوس .. ومش عاوزين ربنا يفرقنا .. ؟  
ده ربنا يحرقنا كمان .. ( يلتفت لزملائه ) ..  
وانا ايه اللي يقعدني هنا في وسط الكفر  
والضلال ؟ .. انا راجل مش حاعيش قد  
اللي عشته .. انا اروح اموت جنب قبر  
رسول الله .. ( يخرج من مكانه متجها للخارج  
وقد انتابته نوبة اقرب للذهيان ) .. اتاجاي لك  
يا حبيبي .. جاي لك .. يا حبيبي .

**نوح :** ( بحزم شديد ) .. اقعد مكانك يا استاذ ..  
اقعد مكانك .. ( للجميع ) .. انتم بالذات  
ممنوع حد فيكم يخرج بره البلد ..

**مدير الاوقاف :** ( هادئا ومتمالكا لنفسه تماما ) .. يعني ايه  
ممنوع نخرج بره البلد ... انا مواطن زيني  
زيك يا استاذ .. ومن حقى دستوزيا انى  
اخرج وقت ما انا عاوز ...

**نوح :** الظاهر انه كان يجب اقول لكم حاجة مهمة ..  
انا عندي كل الصلاحيات في المحافظة بما  
فيها اعدام اى حد .. و دلوقت اتفضل  
اقعد ..

( مدير الاوقاف يجلس مصغوا )

**مدير الصحة :** ( يحاول ان يبدو قيقا وهادئا ) .. الواقع  
مسألة الخروج دى ، في حاجة لاعادة نظر ..



يعنى مثلا .. انا مرتبط بموعد .. بكره  
الصبح فى لندن . وحارجع مصر تانى فى  
نفس اليوم .. ( نوح ينظر له بحدة ، فتبدأ  
الكلمات تموت على شفثيه ) .. الساعة حذاشر  
بالكتير .. او ممكن أرجع بطيارة المغرب ..  
حارجع آخر النهار .. والله العظيم ..  
ومستعد أحلف لك على .. يعنى .. حضرتك  
.. أنا آسف ..

توحيد

: أستاذ نوح أنا آسف للمظهر اللي بيبدو بيه  
بعض الحاضرين .. لكن أرجوك .. كمن ..  
الى فات من كلامك هو الجزء المؤلم ..  
ولكن الخطير والمهم .. هو .. حانعمل ايه  
.. ؟ .. ماذا سنفعل لانقاذ الوادى .  
( لحظة سست .. ثم يبدأ نوح فى الكلام )

نوح

: لقد بحثت المسألة على كافة المستويات ، فى  
سرية كاملة .. وأخيرا تم وضع خطة شاملة  
لانقاذ كل محافظة على حدة .. والخطة  
الخاصة بانقاذ محافظة مصر .. اطلق عليها  
« عملية نوح » .. وأنا المسئول عن تنفيذها  
.. وقبل أن ندخل فى تفاصيل الخطة .. أود  
أن اشرح لكم الاساس النظرى الذى بنيت  
عليه الخطة ... بما أنه لا يمكن عمليا انقاذ  
كل الناس .. لذلك فقد اتفق على انقاذ  
روح مصر نفسها .. وبعد دراسات طويلة .  
استقر الرأى أن روح مصر مركزة فى أحسن  
عناصرها .. أحسن العقول فيها ... وهى  
دى عملية نوح .. المطلوب عمل كشوف

بأسماء أحسن العناصر في البلد .. من كل  
 زوجين اثنين .. أحسن مهندس .. أحسن  
 مهندسة .. أحسن طبيب .. أحسن  
 طبيبة .. أحسن مدرس .. أحسن مدرسة  
 .. وهكذا .. في كل المهن .. في كل المجالات  
 .. مطلوب عمل كشوف بأسماء عشرة آلاف  
 شخص .. نستطيع أن نقول عنهم ، هؤلاء  
 هم روح مصر .. ( يتوقف لحظة ) .. فيه  
 مركب أبحاث تقف الآن .. في عرض البحر  
 .. فوق منطقة الهزات الأرضية .. وفيها  
 واحد من خيرة علمائنا في الارصاد ..  
 قبل وصول الأخدود وحدث الطوفان بوقت  
 كاف . المركب دى بتدبنا انلار .. قبلها  
 بأربعة وعشرين ساعة .. الانذار بيجلى  
 على تليفون داخل هذه الحقيبة .. هذه  
 الحقيبة لا تفارقنى ليل نهار .. ( يشير داخل  
 الحقيبة ) .. فيه هنا مظروف أصفر كبير .  
 مكتوب عليه « عملية نوح » فيه تفاصيل  
 الخطة كاملة وفيه أوامر التشغيل لكل الجهات  
 اللى حاشترك في العملية .. عند حدوث  
 الانذار . ستنطلق عشرات الأجهزة لتحضر  
 هؤلاء العشرة آلاف شخص ، حيث سيتم  
 نقلهم بالطائرات والقطارات والسيارات الى  
 الاسكندرية .. حيث يجدون في انتظارهم  
 ثلاثة مراكب كبيرة .. حمولة هذه المراكب  
 عشرة آلاف شخص .. بالإضافة الى عشرة  
 آلاف كيلو جرام من الوثائق شديدة الأهمية

.. بعد ذلك ستنتقل المراكب الى عرض البحر ... وبعد حدوث الطوفان .. ستعود المراكب .. لترسو في مكان معين .. غرب ما كان يسمى بوادي النيل .. وفي الصحراء .. سوف نبدا مرة اخرى في بناء بلدتنا .. والآن ... المطلوب من حضراتكم الاتي ...  
اولا ... السرية المطلقة .

ثانيا .. الموضوعية التامة والحياد الشديد .. والنزاهة .. في اختيار هذه العناصر ..  
ثالثا ... ان يسير كل شيء في حياتنا في مجراه الطبيعي .. كل مشاريعنا هي .. كل شيء في حياة الناس يجب ان يسير كما هو ... لا تتصرفوا على اساس ان الفرق ينتظرونا في النهاية .. أرجوكم ، أفهموني .. لا تتصرفوا على اساس ان كل شيء قد انتهى .. لان هذا معناه ان الاهمال والفساد ، حاسود كل حياتنا .. فاذا شعرت الناس بذلك .. ستكون النتيجة اننا سنفرق من غير مياه .. ومن غير طوفان .. أرجوكم .. لنعمل في كل المجالات بجد .. بل وبجد اكثر من ذي قبل .. والآن ايها السادة .. اى سؤال ؟ ..

مدير الاحتفالات : لو سمحت لى يافندم ..

نوح : اتفضل ..

مدير الاحتفالات : لو سمحت لى يافندم .. هو صحيح سؤالى قد يبدو للوهلة الاولى غريب .. ولكنه في تصويرى .. شديد الأهمية .. بل وشديد

الصلة بعملية نوح العظيمة .. بعد ما بنى  
البلد دي ، حانسميها آيه ؟  
: زى ما هو .. وزى ما كان وزى ما حايكون  
.. للأيد ..

**نوح**

**مدير الاحتفالات :** أنا مش قصدى المحافظة .. ما هو طبيعى  
حايبقى اسمها القاهرة ... ولو ابنى باقتراح  
تعديل بسيط .. انها تبقى القاهرة نوح العظيمة  
.. عموما هذا الموضوع سابق لأوانه .. ولكن  
سؤالى ينصب أساسا على بلادنا ككل ..  
بعد ما ننقلها .. ونبنيتها تانى .. حانسميها  
آيه .. ؟

**نوح**

: والله يا أخى أنا مش عارف اسمها تابعكم فى  
آيه ؟ .. حتى الأشياء الجميلة البسيطة اللى  
فى حياتنا ، ما حدش بيجرؤ يغير اسمها ..  
لا أحد يجرؤ على تغيير اسم الهرم وأبو الهول  
.. لا أحد يجرؤ على تغيير اسم سيمفونية  
مثلا .. ومع ذلك أنتم أحرار .. سموها زى  
ما تسموها بس نعملها فى الأول ..

**مدير الاحتفالات :**

( يجلس ) .. متشكر يا فندم .. والله العظيم  
هو ده رأيى من الأول وطول عمرى باقول  
لهم كده ..

( مدير الخزنة العمومية يقف )

**مدير الخزنة**

: فيه ناس مش موظفين فى المحافظة .. وفيه  
متعنين على مكافآت .. وفيه ناس على درجات  
.. بس لم يشملهم التقييم الجديد .. وفيه  
ناس معارين لمحافظة أخرى .. وفيه ناس  
تبع المحافظة .. بس ساكنين فى الدقى

والعجوزة .. يعنى فى زمام محافظة الجيزة  
.. حانتصرف معاهم ازاي ؟ .

( يجلس )

: وفيه ناس مفصولين من الاتحاد الاشتراكي ..  
ناس معزولين .. وناس مستبعدين .. حايكون  
موقفنا منهم ايه .. ؟

: انا كلامى واضح جدا .. المطلوب هو احسن  
العناصر فى البلد ..

: تسمح لى يافندم ..

: اتفضل ..

: الأساس النظرى لعملية نوح .. أساس  
خاطيء .. أيضا شرعية العملية منعدمة ..

والعملية كلها .. بالرغم انها براءة .. الا انها  
رومانسية .. بعيدة عن الواقع .. ويتأخذ من

الماضى اكثر مما تستوحى المستقبل ...  
العملية كلها لا تعدو أن تكون تنفيذ عصرى

لعملية سيدنا نوح القديمة .. وهذا شئ

شديد الرومانسية والسذاجة .. عملية بها  
من حسن النوايا .. أكثر مما بها من العلم ..

: أستاذ توحيد .. من غير خطابة .. العملية  
غلط ليه .. ؟

: روح مصر لا تعنى احسن عناصرها .. روح

مصر تعنى المصريين .. المصريين كلهم .. ده

الاساس النظرى السليم .. أما من ناحية

الشرعية .. ما حدث له الحق فى الوصاية على

حد .. كل واحد فينا ، يمتلك قدر من -

الأرض مساوى لزميله .. يمتلك قدر من الهواء

مساوى لزميله ..

مدير الاعلام

نوح

توحيد

نوح

توحيد

نوح

توحيد

نوح

: يعنى ايه .. ؟

توحيد

: يعنى ليس من حق أحد .. أى أحد ، أن يخفى  
أى حقيقة عن الناس . إذا كان كل مواطن  
معرض لقدر من احتمالات الفرق فمن حقه أن  
يتمتع أيضا بقدر من احتمالات الانقاذ .. معنى  
هذا . أنه يجب عرض هذه الحقيقة فورا على  
مجلس الشعب .. وعلى الناس .. بكل وسائل  
الاعلام ..

نوح

: برضه فكرنا فى ده يا أستاذ توحيد .. عندنا  
برضه ناس خياليين زيك . كانوا بيطالبوا  
بكده .. ولكن ماذا ستكون النتيجة .. ؟ ..  
أقصى درجات الدمار .. انهيار المعاملات  
المالية .. انهيار كل شئ ..

توحيد

: هو ده الخطأ .. أننا نتصور دائما أن الناس  
لسه ما بلفتش سن الرشد .. واننا  
أوصياء عليهم ...

نوح

: أستاذ توحيد .. بلاش ندخل فى مهارات ..  
إذا عندك جديد قوله .. دى خطى .. إذا  
كان عندك خطة ثانية .. اتفضل اعرضها ..  
: عندى ..

توحيد

نوح

: اتفضل .. تعالى أقف مكانى ..

( نوح وتوحيد يتبادلان مكانهما .. توحيد الآن يقف  
على المنصة .. ويبدأ فى شرح خطته بحماس شديد بإشارات  
من يده على الخريطة )

توحيد

: عظمة أى شعب تنبع من قدرته على تحقيق

أشياء تبدو خالية .. ولكن اؤكد لكم انها الخطأ  
 الوحيدة الواقعية والواجبة التنفيذ .. احناليه  
 نستنتى لما نفرق .. احنا نبدأ من دلوقة ..  
 من اللحظة دى .. لماذا نتحرك غرب  
 النيل .. ؟ .. لماذا لا نتحرك شرق  
 النيل .. ؟ .. مش سكان القاهرة فقط ..  
 سكان كل المدن .. المسافة بيننا وبين قناة  
 السويس . مائة وعشرين كيلو .. نمشيهم ..  
 وبعد ما نعدى قناة السويس .. نبدأ من جديد  
 فى أرضنا ..

(تتأثر التعليقات)

: ده بينادى بالحرب ..

: ده عاوزنا نروح فى داهية ..

: رزل .. مش قلت لك ..

: ظروف المعركة حاليا مش مهيأة .. والحصون

الى العدو عاملها على القناة تجعل من الصعب ..

بل من المستحيل فى الظروف الحالية ..

: (مقاطعا) .. انا ما تكلمتش عن الحرب ..

كمان ما بفهمش فيها .. لكن بافهم فى الناس

كويس .. لا قوة فى الوجود تستطيع

الوقوف فى وجه شعب بأكمله .. الشعب

كله .. بنسائه وأطفاله .. يمشى على الأقدام

فى اتجاه المنطقة دى (يشير لسيناء) ..

يحمل مواد البناء .. هى دى شرعية العملية

يا جماعة .. أن الشعب بيتحرك بعيدا عن

الخطر .. من أرضه .. لأرضه .. لا لشىء الا

لكى يبنى نفسه من جديد .. واؤكد لكم اننا

....

....

....

مدير الدفاع

توحيد

في الحالة دي .. جانتحرك في حماية أصحاب  
الضباط في العالم كله .. لا شيء في التاريخ  
جدير بالاحترام مثل شعب يناضل من أجل  
بقائه .. ومما كانت الخسائر في العملية دي ..  
الا انها لن تكون في حجم خسائر « عملية  
نوح » .. التي أشك أصلا في امكانية  
تنفيذها .. أشكركم ..

( يترك المنصة ويجلس .. ينفض نوح )

**نوح**

: أخ توحيد .. مع احترامى الشديد لوجهة نظرك  
.. الا اننى لست هنا من أجل مناقشة خطط  
جديدة .. انا هنا من أجل تنفيذ « عملية  
نوح » .. ( يضع يده على الكتابين المقدسين  
والسندس ) .. والان ايها السادة .. سوف  
نقسم جميعا ..

**توحيد**

: ( منفلا ) .. انا حالف معاكم .. وحاذل  
كل جهدى من أجل انجاح « عملية نوح » ..  
ولكنى .. وأرجو من الأخ سكرتير الجلسة انه  
يثبت تحفظاتى .. لست مؤمنا بشرعية هذه  
العملية ... كما اننى أيضا ، لا ائق في  
نجاحها ..

( توحيد يتجه للمنصة ويضع يده فوق يد نوح ،

الموجودون يقبعونه ، تختفى إضاءة المسرح بالتدريج )

\* \* \*



## المشهد الثاني

( على سطح مركب الأبحاث . نوح مستنداً إلى السياج ،  
يحقق في البحر . . بجواره مائدة صغيرة وثلاثة مقاعد . .  
المكان غارق في أشعة الشمس ، تدخل فاطمة تحمل بين  
يديها صينية عليها أدوات الشاي )

نوح : متشكر يادكتورة فاطمة . . الواقع أنا باتعبكم

لما باجى . .

فاطمة : بالعكس . . أنا دايعا باعمل الشاي للدكتور في

الميعاد ده . .

نوح : هو فين دلوقت ؟

فاطمة : أنا وديت له الشاي في المعمل تحت . . حايجي

بعد شوية . .

نوح : فيه حاجة مهمة . . ؟

فاطمة : أبدا . . مرور عادى . .

( تصب له الشاي )

نوح : بتشتغلي معاه بقى لك كثير . . ؟

فاطمة : أنا كنت تلميذته . . ولما اتخرجت . اشتغلت

معاه . . أنا باشتغل معاه من عشر سنين . .

نوح : مبسوطه من الحياة دى . . ؟

فاطمة : جدا . . أنا ماليش حد . . اخواني كلهم

اتجوزوا . . والدى ووالدتي توفوا من

زمان . . أنا ماليش حاجة في الدنيا غير

شغلى .. ومن حسن حظى أنى باحب البحر ..  
البحر يبشعر الانسان بالسلام الحقيقى .. نوع  
من الهدوء الرقيق يخليك تشعر بجمال كل  
شئ .. وذه شئ مهم جدا .. خاصة فى  
انتظار .. ( تتردد ) .. فى انتظار .. على  
العموم .. جابنحشش هنا بالملل .. المركب  
نصها معمل ونصها مكتبة .. الدكتور كان  
جايب كل مكتيته الموسيقية ..

فاطمة .. انت قلت فى انتظار .. وما كملتش : نوح

الجملة .. فى انتظار آيه .. ؟

فاطمة : فى انتظار النهاية .. أنا مشتركة مع الدكتور

فى رصد الظاهرة دى من ست سنين تقريبا ..

نوح : يعنى عارفة كل حاجة .. ؟

فاطمة : قبل انت ماتعرف ..

نوح : ومع ذلك مش باين عليكى أى احساس

بالفزع ..

فاطمة : فى الاول خسيت بالرعب .. لكن بعد كده

بدأت أحس بالهدوء .. بل وبدأت أمتع

بحياتى أكثر من الاول .. أسطوانات ماكنتش

سمعتها .. باسمعها .. كتب ماكنتش

قريتها .. باقراها .. اكتشفت أن أهم شئ

فى حياة الانسان .. أنه يبقى له دور .. ودور

مهم للآخرين .. أخيرا اكتشفت أنا عايشة

ليه .. ؟

نوح : ليه .. ؟

فاطمة : الانذار اللى حاوصل لك على التليفون ده ..

( تشير للحقيبة ) .. أنا مسؤولة عنه ..

الدكتور وأنا مسئولين .. يعنى أنا باتحمل  
نص مسؤولية التنبيه لتنفيذ « عملية نوح »  
.. بأشارك فى مسؤولية التنبيه لانتقاذ روح  
مصر .. هى دى الحاجة اللى أنا عايشة  
عشانها .. وعشان كده ... أنا هادية  
جدا .. مش شاعرة بأى خوف ..

: والبشارة اللى هنا .. ؟

نوح  
فاطمة

: مش عارفين حاجة على وجه التحديد ..  
بس من الواضح انهم حاسين أن فيه حاجة  
خطيرة حاتحصل .. وانهم مسئولين عن  
عملية كبيرة ..

: وعرفتى ده ازاي .. ؟

نوح  
فاطمة

من سلوكهم .. هادين جدا .. ما حدش  
منهم بيفكر ياخذ أجازة ويسيب المركب ..  
هم بيتقوا جدا فى الدكتور .. وببشتغلوا معاه  
من سنوات طويلة ..

: تفكرى يا فاطمة .. لو الناس كلها عرفت ..  
لو قلنا لهم الحقيقة ... حايبقى سلوكهم ،  
هو نفس سلوك البشارة اللى هنا .. ؟

نوح

: مش أنا اللى أجاب على السؤال ده .. لأنى  
ماشتغلش فى السياسة قبل كده .. انت  
اللى تجاوب ..

فاطمة

: ما انت عارفة يا فاطمة .. سنوات طويلة  
والقيادة بتفكر بالنيابة عن الناس .. كل  
القرارات بتنزل من فوق .. فلما نيجى فى  
الآخر ونقول لهم الحكاية دى .. يبقى  
جنون ..

نوح

- فاطمة : فعلا .. يبقى جنون .. لازم يعرفوا دورهم  
حايبقى آيه .. لو عرفوا المطلوب منهم  
حاتختلف النتيجة .. ( فحاجة ) .. وبعدين ..  
انت كل ما تيجى تتكلم فى الناس والسياسة ..  
ما تكلمنى عن البحر يا أخى .. كلمنى عن  
الشمس كلمنى عن نفسك .. نوح ..
- نوح : آيوه ..  
فاطمة : انت مين ؟ ..  
نوح : ماعرفش .. مفيش حاجات مؤكدة باعرفها  
عن نفسى .. الشئ المؤكد انى باحب اشوك  
.. باحب أقعد معاكى ..
- فاطمة : ده غزل .. ؟  
نوح : صدقيني .. مرة فكرت ان حد غيرى يتحمل  
مسئولية العملية ..
- فاطمة : وانت .. ؟  
نوح : آجى هنا .. أقعد معاكى للأبد ..  
فاطمة : ( تضحك بصفااء ) .. عموما الابد مش بعيد  
قوى .. جايز يكون بكره .. جايز يكون  
بعده .. جايز يكون بعد ثوانى ..  
( يقترب الدكتور الجيولوجى .. فى حوالى السبعين أشيب  
الشعر .. هادى ، يتكلم بتؤدة ورقة )
- الدكتور : أقول آيه ؟ .. آسف عشان اتاخزت عليكم  
.. والا آسف عشان ازعجتكم .. ؟
- نوح : أهلا يا دكتور ..  
( الدكتور يلتفت لفاطمة وهو يجلس )
- الدكتور : من فضلك يا فاطمة .. هاتى لى آخر قراءات  
من تحت ..

- فاطمة. : حاضر .. حانكامل كلامنا بعدين يا نوح  
( تخرج ، الدكتور يدخن البايب وهو يحلق في البحر )
- الدكتور : البحر جميل النهاردة ..
- نوح : دكتور ..
- الدكتور : أم
- نوح : دى زيارتى الأخيرة للمركب ..
- الدكتور : برضه تخليك على اتصال بى ..
- نوح : ضرورى .. ( لحظة ) .. دكتور احنا عملنا  
كل الترتيبات اللازمة من أجل عملية الانقاذ ..  
الا انى جاى اسأل حضرتك سؤال أخير ..  
هل فيه احتمال ولو واحد فى المليون أن كل  
اللى بنفكر فيه .. ما يحصلش ؟
- الدكتور : ( يفكر للحظات ) .. لا .. حايحصل ..  
اسمع يا نوح .. أنا كعالم .. ما قدرش  
اسمح لنفسى انى اخدكم .. دايمًا فيه احتمال  
وجود خطأ فى أبحاثنا .. وفى الحالة دى  
تحصل المعجزة .. لكن تبقى خيانة لو سبتكم  
تخططوا فى انتظار معجزة ..  
( يرتشف الشاى ويدخن وهو ينظر للبحر فى استمتاع زائد )
- الدكتور : لسه ما أدركتش الجانب المشرق فى الحكاية  
دى .. ؟
- نوح : مشرق ! .. حضرتك بتقول مشرق يا  
دكتور .. ؟ ..
- الدكتور : مش مشرق وبس .. ده عظيم كمان ..  
التاريخ طول عمره بيقول أن مصر هبة النيل ..

لأول مرة في التاريخ .. حاتبقى بلدنا من  
صنعنا احنا .. شىء عظيم لما تبقى مصر ..  
هبة المصريين ..

: والملايين اللى حايموتوا .. ؟

: كانوا حايموتوا بشكل أو آخر .. مفيش حد  
بيعيش للأبد .. ( لحفظة ) .. اللنش حايوصل  
امتى ؟ ..

: ( ينظر في ساعته ) .. بعد دقائق ..

: فاطمة حاتنزل معاك مصر ..

: عندها أجازة .. ؟ ..

: دورها معايا انتهى .. كفاية عليها كده .. البنت  
دى عمرها ما تمتعت بحياتها ..

: ( بهراة ) .. متأخر قوى يا دكتور .. متأخر  
قوى .. ياريت كنا اتقابلنا في ظروف ثانية ..  
دايمًا فيه وقت للحب .. خصوصًا في ظل  
الخطر ..

: ما اعتقدش اتى حاقدر أسعدها ..

: عمومًا السعادة شىء مش مطلوب في الفترة  
دى ..

( تظهر فاطمة ، تحمل ورقة صغيرة تسمىها أمام الدكتور )

: ( يحدق في الورقة باكتئاب ) .. فاطمة ..

: حاتنزل مصر دلوقت .. حضرى شنطتك ..  
مامورية ؟ ..

: أيوه ..

: كام يوم .. ؟

نوح

الدكتور

نوح

الدكتور

نوح

الدكتور

نوح

الدكتور

نوح

الدكتور

الدكتور

فاطمة

الدكتور

فاطمة

الدكتور	: ما عرفش .. دورك هنا خلص .. الباقي على أنا ..
فاطمة	: ( تدرك غرضه ) .. دكتور أنا مش حاسيب المركب ..
الدكتور	: من فضلك انزلى حضرى شنطتك .. ( صوت اقتراب اللنش ) .. اللنش وصل ..
فاطمة	: مش حاسيب المركب يا دكتور ..
الدكتور	: ( بجفاف ) .. دكتورة .. ما تخلينش اعمالك بطريقة رسمية .. ( يخرج من جيبه ورفقتين ) .. ده جواب بانتدابك للتدريس فى جامعة القاهرة .. واذا رفضتى ... يبقى ده جواب بفصلك .. ( تهاق فيه لحظة ثم ترمى عليه ثعائه ، يملو صوت اقتراب الlnش .. تحفت الإنشاء )



### المشهد الثالث

(قاعة المجلس الشعبي . نوح يدخل ومعه حقييته وملف كبير ، يفتح الملف ويقلب فيه بثوتر خفيف ، تتصاعد صهيته ، يحاول قدر استطاعته أن يتمسك بهدوئه . . . يدخل توحيّد حاملاً بعض اللوحات الورقية )

: أهلا يا توحيد ... أخبارك آيه .. ؟

نوح

( توحيد يفرد أوراقه )

توحيد

: ده تصميم مبدئي للبلد .. أرجو تستعينوا بيه وانتم بتشتغلوا .. زى مانت شايف ..  
أهم شيء فيها ، المصانع والطرق .. دى طرق تربطنا بأفريقيا .. كل أفريقيا .. ودى تربطنا بآسيا .. وكل المنطقة العربية ، ودى ممتدة لأوروبا .. ودول عدة ضواحي صغيرة .. للمفكرين والعلماء والفنانين .. ودى مدينة صغيرة خاصة بالأطفال ..

: عملت حساب كام سنة .. ؟

نوح

توحيد

: ألف سنة لقدام .. ولذلك تلاقى هنا أماكن للمليون مصنع ، ألف مسرح .. خمسة آلاف دار سينما ..

( يخرج أوراقاً أخرى )

.. تلاحظ أن كل مبنى حجمه كبير ...  
وجميل في الوقت نفسه ... مبنى واحد



ما عملتش تصميمه .. ( نوح ينظر له  
بتساؤل ) .. السجن .

: تفكر مش حاجتاجه .. ؟

: حاجتاجوه طبعاً .. السؤال ... حانطوا فيه

مين ؟ .. وبناء على الإجابة .. يتعمل

التصميم .. وعلى كل حال .. مش حاعمل

له تصميم .. أى حد تانى يعمله ..

: الجماعة اشتغلوا بسرعة البرق .. أحسن

عشرة آلاف واحد فى البلد .. اختاروهم فى

جمعة ..

: أبوه ..

: عارف أنك مش فيهم ..

: أنا مش أحسن مهندس معمارى فى البلد ..

: جايز يا توحيد .. بس من المؤكد ، أنك

أكثرهم أخلاصاً ..

: متشكر جداً .. أنا كل اللى باطله .. تعملوا

حساب صندوق وزنه عشرة كيلو جرام ..

حاحط فيه الرسومات والتصميمات ..

يمكن تنفعكم .. وبرضه يا استاذ نوح .. أنا

لازلت باطل من حضرتك إعادة النظر فى

« عملية نوح » ...

: ( بفضب خفيف ) .. أنا مش حاسنكم فى

الموضوع ده تانى يا توحيد ..

( تدخل المبحومة .. يتخلون أماكنهم )

: أيها السادة .. أشكر لكم جهدكم فى أعداد

الكشوف ، فى هذا الوقت القصير ..

( يتصفح الملف بسرعة ) .. لكن .. بعد نظرة

نوح

توحيد

نوح

توحيد

نوح

توحيد

نوح

توحيد

نوح

نوح

سريعة للأسماء ، بنكتشف ان أحسن مهندس  
معماري في البلد .. هو الدكتور فلان الفلاني  
مدير الاسكان .. أحسن طبيب هو الدكتور  
فلان الفلاني مدير المنطقة الطبية .. أحسن  
مدرس هو الأستاذ فلان الفلاني مدير التربية  
والتعليم .. أحسن ظابط شرطة هو اللواء  
فلان الفلاني مدير الأمن .. أحسن عالم  
ديني هو السيد فلان الفلاني مدير الاوقاف ..  
أكبر اقتصادي هو السيد مدير الخزنة ..  
الى آخره .. يعنى حضراتكم ... أحسن  
ناس في البلد ..

: حضرتك بتسأل .. والا بتشتتم ؟  
: صدقنى ، أنا بأسأل ..  
والله ما تسألناش احنا .. أسأل اللى عينونا ..  
: لو ما كناش أحسن العناصر في البلد ..  
تفتكر كنا حاتوصل لمناصبنا دى ازاى ؟ ..  
: أنا مش مسئول عن اللى بيعمله غیری ..  
امبارح مش مسئولیتی .. أنا مسئول عن  
بكره ..

: نفهم من كده .. ان حضرتك بتطعن في  
كفاءتنا ..

ده بيظن في نراحتنا كمان ..  
ياريت كان على كده ويس ... ده كمان  
بيظن في نراة اللى حطونا هنا  
كل ده مش قصدى .. كل اللى أقصده ان  
حضراتكم لما حاتيجوا تعملوا البلد تاتى من  
جديد .. حاتعملوها زى ما عملتوها .. وزى  
مائتم عاملينها دلوقت ..

مدير الثقافة

نوح

مدير الخزنة

مدير التعليم

نوح

مدير الاسكان

مدير الاوقاف

مدير التموين

نوح

**مدير التعليم** : الله .. ده حايباجم .. اذا كان فيه قصور  
في بعض النواحي .. فده راجع لقلّة  
الامكانيات ..

**مدير الإسكان** : والانفجار السكاني .. لكن انشاء الله .. لما  
نيجي نعملها تاني .. حاشستغل على رواقه ..

**مدير التكوين** : يا جماعة الأستاذ نوح بيلف ويدور عشان  
يتهمنا بعدم النزاهة ..

**نوح** : انا ما جيبتش سيرة النزاهة .. لكن ما دمت  
مصرين تتكلموا فيها .. أناليه سؤال ..  
انا عاوز أعرف .. الأستاذ مدير الاحتفالات  
.. اسمه محطوط في الكشف ليه .. ؟ ..  
دوره حا يكون أبه انشاء الله .. ؟

**مدير الاحتفالات** : ( يقف ) .. انشاء الله يافندم .. بعد ما  
تنزلوا من المراكب .. وتيجوا تبناو البلد ..  
مبش محتاجين حد يحتفل بيكم .. ؟

**نوح** : قصدك يطبل ويرمر .. لا .. المرة دي  
حاشستغل من غير طبل .. ومن غير زمر ..

**مدير الاحتفالات** : اللى تشوفه يافندم .. هو أنا اكراهه .. هو  
إننا اكراهه أن احنا نشتغل من غير طبل ومن غير  
زمر .. والله العظيم هو ده كان رأيي طول  
عمرى .. واصلنته في أشد العهود ظلمة ..  
وخصوصا أيام مراكز القوى .. أيام ما  
كانوا ..

**نوح** : ( مقاطعا ) .. عزيزي انفضل أقعد .. ومادام

حضراتكم أحسن ناس في البلد .. المهندس  
توحيد اسمه مش موجود في الكشفو فيه ..؟

**مدير الخزنة :** القاعدة اللي حطيناها .. اننا ناخذ درجات  
الإدارة العليا .. مش معقول يبقى عندنا مدير  
عام . اللي هو السيد مدير الاسكان ..  
ونسبيته وناخذ الأخ توحيد اللي لسه فئة  
خامسة ..

**نوح :** معقول .. ( يتصفح الملف ) .. كلامك معقول  
منطقي .. عندك حق .. فيه ملحوظة ثانية ..  
هي البلد اللي حاتمعمل دي .. مش حايبقى  
لها عقل .. ؟ .. عقلها فين .. ؟ .. فين  
أحسن كاتب .. فين أحسن شاعر .. مفيش  
رسام .. ؟ .. مفيش نحات .. ؟ ..

**مدير الإعلام :** مدير الاسكان بيكتب شعر .. ومدير التموين  
بيكتب مسرحيات .. ومدير الصحة يعرف  
يكتب لك عشر قصص في ليلة ..

**مدير المواصلات :** وأنا أعرف أرسم بالزيت .. والتماثيل اللي في  
الحوش دي أنا اللي عاملها .

**مدير الخزنة :** حانجيب ناس من الخارج ليه .. ؟ .. هي  
زيادة عدد .. ؟ .. الحق علينا اللي بنوفر لك  
أماكن ..

**مدير الأوقاف :** .. باجماعة واضح أن الأستاذ نوح يشك في  
ذمتنا .. ولذلك احنا نسحب الكشفو ..  
ونسبيته ينقى بنفسه ...

نوح : عاوزين تحطو زهرى للحيطه .. عشان  
اختارهم لوحدى محتاج خمس سنين على  
الاقل .. اسمعوا يا جماعة .. مبدئيا ،  
انا موافق على الكشوف دى ...

توحيد ( يقف مقاطعا بعصية ) ... مادام حضرك  
موافق مبدئيا .. يبقى انا باطلب منك انك  
تسجل فى محضر الجلسة .. ان عملية نوح  
التي بدأت من أجل انقاذ روح مصر ..  
تتحول الآن لتصبح عملية انقاذ الموظفين ...

نوح : ( يرتفع صوته هو الآخر ) ... ما تقاطعنيش  
يا توحيد .. استنى لما اخلص كلامى ..  
( بهدوء ) .. مبدئيا .. انا موافق على  
الكشوف دى .. وبأعلن فى الوقت نفسه حل  
المجلس ... وبعد ستين يوم .. حاتحصل  
انتخابات جديدة .. لاختيار أعضاء جدد  
للمجلس ..

( نوح وتوحيد يتبادلان نظرات سادة ... يبطه  
شديد .. تزل ..... )

## الستار



## الفصل الثامن





## الشهد الاول

( مكتب نوح فى المحافظة ، نوح وفاطمة ... ، مظهر  
نوح يدل على أنه يعمل منذ وقت طويل ، يتناول وجبة  
غذاء خفيفة ، فاطمة تراجع بعض الأوراق بسرعة  
ثم ترفع سماعة التليفون )

: الو .. مكتب الأستاذ نوح فى محافظة مصر ...  
من فضلك ممكن اكلم الدكتور حسن ...  
( نوح يرقب المكالمات باهتمام )

فاطمة

... طب ادينى المدام لو سمحت ...  
: مش موجود هو راخر .. ؟  
: الو ... صباح الخير يا مدام .. يا ترى  
الدكتور حسن حايروج امتى .. ؟  
( تسمع فى صمت واكتئاب خفيف )

نوح  
فاطمة

.. متشكرة يا مدام .. مع السلامة ..  
( تضع السماعة ) .. فى اليونان .. يشرف  
على بناء قرى نموذجية ..

: ( باستياء يشويه التوتر ) .. أحسن مهندس  
معمارى فى مصر بينى قرى فى اليونان ..  
أحسن عالم فى البترول . يشغل فى أمريكا  
.. أحسن قانونى مش عارف منتدب فىن ..  
.. أحسن عالم ذرة .. سافر هو راخر ..  
الظاهر فيه قوة طاردة مركزية .. والغريب

نوح

أن القوة دى ما بتطردهش الا الكويسين  
بس ..

( فاطمة تدير قرص التليفون )

نوح  
فاطمة

: بتطلبى مين ؟ ..  
: ( تلقى نظرة سريعة على كشف فى يدها ) ..  
الدكتور عبد الرحمن .. الو .. صباح الخير  
.. مكتب الأستاذ نوح فى محافظة مصر ..  
.. ممكن اكلم الدكتور والله .. ؟ .. ( لحظة ) ..  
.. حضرتك المدام .. ؟ .. ( تستمع اليها طويلا  
.. يبدو على وجهها انفعال الدهشة المصحوب  
بالانزعاج ) .. عمل حاجة معينة ؟ .. محاضرة ؟  
.. على كل حال يا مدام ما تنزعجيش ...  
قطعا المسألة حانتتهى على خير ... وبسرعة  
انشا الله ، قلبى معاكى يا مدام .. مع ألف  
سلامة .

( تضع الساعة ببطء وانكسار )

... دى اخته ... هو فى بلد عربى ..

: فى الجامعة ؟

نوح  
فاطمة

: فى السجن ... راح اشتغل أستاذ فلسفة ..  
الظاهر قال محاضرة ما عجبتهمش ..

نوح

هو ده يستحيل حاجة .. ده عنده سبعين سنة  
.. سبعين سنة وسبعين كتاب .. ( يضحك  
بمرارة ) .. فى السجن .. قطعا فى أول ربيع  
ساعة حايئسوه كل الفلسفة اللى عرفها فى  
سبعين سنة .. ( يستمر فى الضحك باستمتاع  
.. زوجته تنظر له بهدوء ) ..

- فاطمة : نوح ... حان نروح دلوقت ..
- نوح : لسه قدامنا شغل ... اتصلى بالباقيين .
- فاطمة : انا اتصلت بخمستاشر .. وطلعوا مش موجودين .. لسه فى الكشف خمس أسماء ... ما عندهم مش تليفونات ..
- نوح : نروح لهم بيوتهم ..
- فاطمة : اشمعنى يعنى الخمسة دول هم اللى حايكونوا موجودين ؟ نوح انت ما نمتش من امبارح ...
- نوح : حاسل ايه يا فاطمة .. الكشف دى انا وافقت عليها .. ( يشير لمجموعة أوراق على المكتب ) .. لكن مش مقتنع بالأسماء اللى فيها .. لازم ادور بنفسى عن العناصر الكويسة ..
- فاطمة : شهر كامل لحد ما عرفت عشرين اسم ..
- نوح : طلع منهم خمستاشر مسافرين .. ما تقدرش تشتغل لواحدك .. لازم تعتمد على أعضاء المجلس ..
- نوح : ( يشير للكشوف ) .. ده اللى عمله أعضاء المجلس ..
- فاطمة : انا بتاتكلم عن المجلس الجديد .. مش الانتخابات النهاردة .. ؟
- نوح : ايوه .. والنتيجة حاتطلع النهاردة .. وفيه اجتماع الساعة ثمانية بالليل ..
- فاطمة : بالتأكيد العناصر الجديدة فى المجلس حاتعمل كشف ممكن تظمن لها .
- نوح : الوقت يسرقنا .. لسه حاستنى لحد ما يعملوا كشف جديدة ؟ ... افرضى الكارثة حصلت فى اى لحظة ..

- فاطمة : نشستفل على الكشوف اللى مصالته .. هو ده  
الممكن .. غير كده مستحيل .
- نوح : المطلوب عمل الاستحيل يا فاطمة ..
- فاطمة : .. المطلوب دلوقت انك تنام ساعتين .. عشان  
تبقى فايق لجلسة بالليل ..
- نوح : حنام على الكتبة دى ..
- فاطمة : اذا كنت تقدر تستحمل .. أنا ما قدرش ..
- أنا حاروح .. الدكتور قال لى .. لازم  
استريح ..
- نوح : ( لحظة ) .. ما قلتيش انك رحت للدكتور  
امبارح ..
- فاطمة : ( بتردد خفيف ) .. ما جانش مناسبة ..
- نوح : ما لك يا فاطمة .. فيه حاجة ؟
- فاطمة : مش عارفة اذا كان الخبر ده يضايك والا  
يفرحك .. ( لحظة ) ... حايبقى فيه طفل  
يا نوح ..
- نوح : ( مذهولا . رنة النفس واضحة فى صوته ) ..  
مش ده اتفاقنا ..
- فاطمة : مش دى القضية .. القضية ان حايبقى فيه  
طفل ..
- نوح : دى جريمة ...
- فاطمة : ان يبقى لنا طفل .. ؟
- نوح : انت عارفة ظروفا يا فاطمة .. وعارفة انه  
شئ مستحيل .. أن احنا نعرف نعتنى بطفل  
.. أنا مش حاطلع المركب الا آخر واحد ...
- لحد ما أطمئن أن عملية الانتقال تمت بنجاح ..
- وممكن ما يتمش انتقالنا احنا الاثنين ..

حاهتم بالعملية .. والا اهتم بيكى ويطلقك ؟  
 .. ليه يا فاطمة ؟ .. ليه نزود عدد الفرقى  
 واحد .. ؟

: أنا حاهتم بيه .. ده ابنى والّا مسئولة عنه ..  
 : واطفال الآخرين .. ؟

: ده قدرهم ..  
 : وهو قدره أنه يمشى ... لان ابوه مسئول ..

لان ابوه وامه يعرفوا ينقلوه .. مش كده ؟ ..  
 لانه حايولد مهتار .. ممتاز عن اطفال  
 الآخرين ... مش كده ؟ .. اطفال الآخرين  
 الى حايولدوا معاه فى نفس اللحظة .. دى  
 جريمة يا فاطمة ..

: جريمة ابشع انك تطلب منى اتخلص منه ...

: مش حايحصل .. ( بيدو انه يعانى بشعة ) ..  
 مش حاطلب منك انك تتخلصى منه .. أنا  
 كمان انسان يا فاطمة .. انسان ملين ضعيف  
 .. ويبدو أن مسئوليتى اكبر من قدرتى ..  
 ليه يا فاطمة تعملى كده ؟ ..

: نوح يا جيبى .. أنا من رأى تاخذ مهدى ..  
 وتنام ..

: أنام .. ؟ ه .. فعلا .. ما ليش حق الوهم  
 .. ما ليش حق اليوم أعضاء المجلس لما حطوا  
 أنفسهم فى الكشوف ..

( فاطمة تمرص على أن تكون هادئة طوال المشهد بينما  
 يزداد توتره )

فاطمة

نوح

فاطمة

نوح

فاطمة

نوح

فاطمة

نوح

فاطمة

.. ممكن تحصل معجزة يا نوح .. تحصل  
معجزة والكاريبة اللي بنسناها ، ما  
تحصلش ..

نوح

: انت اللي تقولى الكلام ده .. ؟ .. الدكتور  
في العلوم .. ؟ .. مين اللي بيتكلم دلوقت ..  
فاطمة . الدكتور في العلوم .. والا فاطمة  
الأم ؟ ..

فاطمة

.. علوم ؟ .. ايه اللي نعرفه يا نوح .. ؟ ..  
كل اللي نعرفه .. قشرة . قشرة رقيقة جدا  
في جدار المرفقة .. يثبقى ايماننا ..  
ايماننا ان بكرة حايبقى اجمل من النهاردة ..  
: واذا حصلت المعجزة دى .. حازبيه ازاي ؟  
.. حايبقى ايه في مجتمع عايش وجواه عار  
الهريمة .. وعدو .. على بعد خطوات مننا  
.. بيهددنا كل لحظة .. وكلام دائم عن معركة  
وهميه مش حاتحصل ..

فاطمة

نوح

: ابننا حازبيه كويس ..  
: مش احنا اللي حازبيه .. حايتربى في حجر  
التليفزيون والراديو والسينما والصحافة ..  
الحاجات دى كلها حاتتعاون وتربيه .. يا  
اما تطلعه حمار .. يا اما تطلعه نمر .. يا اما  
يقتى تعلق .. ثعبان ..

فاطمة

نوح

فاطمة

: البيت اهم من ده كله .. حانعمل منه  
انسان .. وافسان كويس قوى .  
: انسان كويس قوى . ويهاجر .. مش كده .. ؟  
: نوح .. انت محتاج ترتاح .. انت مصاب  
بحالة اكتئاب شديدة .. نظرتك بقت  
سوداوية جدا ..

- نوح : حالة اكتئاب شديدة .. ؟ .. أرجو ما  
طلعتش مجنون في الآخر ..
- فاطمة : انت مش في حالة عادية .. ما بتنامش ..
- نوح : اقري الكشوف دى وحاولى تنامى .. ورينى  
حاتعرفى تنامى ازاي .. ولما ادور بنفسى  
على الناس الكويسين اكتشف انهم مشيوا ..
- فاطمة : مش مشكلة .. لوحسوا في اى لحظة ان  
البلد عاوزاهم .. حاييجوا فوراً ..  
( نخرج من مكان ما ... نحده صغيرة ... ومفرش  
كبير ... تضمهما على الكنبه .. )
- فاطمة : انا حاسيبك تنام ..  
( صوت طرق خفيف على الباب )
- نوح : ادخل ...  
( يدخل توحيد ومعه دوسيه ملء بالأوراق )
- نوح : أهلا يا توحيد ... تعالى لما أعرفك بالمدام ..  
.. الدكتورة فاطمة .. المهندس توحيد ..  
( يضافها .. توحيد ينظر له يتسائل )
- نوح : عارفة كل حاجة .. بحكم وظيفتها .. مش  
لأنها مراتى .. تقدر تتكلم قدامها .. توحيد  
ده يا فاطمة معروف في المجلس أنه رزل  
جدا ..
- فاطمة : ... أهلا وسهلا ..
- نوح : ومع ذلك باحبه جدا .. ليه .. مش  
عارف ..
- توحيد : السبب واضح جدا .. لأنى رزل ..

فاطمة

توحيد

: فعلا .. واضح جدا ..  
: لو المجتمع كله تحول لناس ظرفاء .. يبقى  
مجتمع ميت .. لابد يكون فيه مجموعة أفراد  
رزين .. يقولوا .. لا .. وليه .. وفيه  
.. ومين .. وكام ..

نوح

توحيد

: اخبار الانتخابات ايه ؟  
: النتيجة حاطلع الساعة ستة .. ما تخافش  
على .. فيه ألفين صوت فى جيبى .. الادارة  
الهندسية كلها بتثق فى .. انا جاي لك فى  
موضوع تانى ..

نوح

توحيد

: فعلا .. ( يخرج بعض قصاصات الصحف )  
.. مهما كانت الرقابة حديدية الا ان الانسان  
يقدر يكشف اى مجتمع .. من صفحة  
الادب والفن .. ومن صفحة الحوادث ..

فاطمة

توحيد

: فيه حاجة جديدة فى صفحة الادب والفن ..  
: فيه اعلانات .. اعلانات عن مبيدات خشرية ..  
واعلانات عن ..  
( يمد يده ببضعة قصاصات صحف )

نوح

توحيد

: يارزل ... يارزل ..  
: انا باتكلم جد .. ومع ذلك ده مش موضوعى  
.. انا جاي اتكلم فى صفحة الحوادث ..  
( يمد يده بقصاصه اخرى ) .. ده موثلف  
فى بنك .. اختلس ..؟ ألف جنيسه ..  
أربعمائة ألف جنيه ..

فاطمة

: .. ألف .. ؟



توحيد  
نوح  
فاطمة  
توحيد

: أيوه ... أربعة وقدامها خمس أصفار ...  
: ده حرامى .. مفترى قوى ..

: أو مجنون ..

: لا هو حرامى .. ولا هو مجنون .. ده واحد  
متأكد أن اللعبة خلصت .. وإن كل واحد  
لازم يمد أيده .. وياخد نصيبه .. فيه  
مثل بيقول أن خرب بيت أبوك .. الحق خد  
لك منه قالب .. فهو مد أيده .. وخذ  
قالب .. بس ما خدش قالب طوب .. خد  
جدار بحاله ... ( يمد يده بقصاصات  
أخرى ) .. دى .. حادثة ثانية .. صاج  
.. هاج اتسرق من الترسانة البحرية فى  
اسكندرية .. صاج يعمل مركب ، تقدر  
تتصور حجمه ، لو تصورت أن فيه حد  
سرق أبو الهول .. تقدر تتصور يعنى أيه  
مجموعة من الناس تسرق صاج يعمل مركب ..

: وده معناه أيه ؟

: برافو يا مدام .. لو سألت ثلاثة أسئلة كمان  
.. حتاخدنى لقب شخص رزل ..

: مزاجك عال قوى النهاردة ..

: جدا .. لما بتتزايد شحنة الألم جوايا ..

باحس أنى شخص مرح جدا .. ( يحزن ..

ويبطئ ) .. ده معناه ببساطة .. أن السر

اتعرف .. بص حواليك كويس .. السلوك العام

ملء باللامبالاة .. والاهمال .. والكذب ..

وده معناه أن فيه احساس عام بالنهاية ..

فاطمة  
توحيد  
نوح  
توحيد

- فاطمة : لازم حد اتكلم ..
- توحيد : ما اعتقدش ..
- نوح : يبقى أعضاء المجلس اهلوا في شغلهم ..  
فالناس اتصرفت زيهم ..
- توحيد : أعضاء المجلس ما اهلوش في شغلهم ..  
هو شغلهم كده .. ما يعرفوش يقدموا  
اكثر من اللى بيقدموه .. بتظلمهم لما بتطلب  
منهم يشتغلوا بجدة اكثر .. اوعى تصدق ان  
اللى بيقيم في الصح .. يعرف يعمل الغلط ..  
والحل ؟ ..
- فاطمة : حل واحد يا مدام ... ( يلتفت لتوحيد ) ...
- توحيد : الفنى عملية نوح فوراً وفكر في مشروعى ...
- نوح : انا طلبت منك ما تتكلمش في الحكاية دى  
تاتى ..
- توحيد : حاولت .. ما قدرتش .. حتى لو قطعت  
لسانى ... حالكلم واكتب على ورق  
واقدمهولك ..
- نوح : ( مجتهداً ) .. يا توحيد ما ترغمنيش انى اغير  
طريقتى في معاملتك ..
- فاطمة : ( تهدىء الموقف ) .. ما تعقدش المسألة يا  
نوح .. ( لتوحيد ) انت عندك مشروع  
تاتى يا باشمهندس ..
- توحيد : ايوه يا مدام .. مطلوب من كل سكان المحافظة  
انهم يمشوا على رجلهم ١٢٠ كيلو .. مائة  
وعشرين كيلو .. ويعدوا قناة السويس ..  
بمايه او من غير مائة .. حانفرق لو استثنينا  
هنا ..
- ( لحظة صمت .. يبدو عليها أنها تستوعب مشروعه جيداً )

- فاطمة : حاتحصل معركة ..
- توحيد : مش حاتخسر فيها كثير ..
- فاطمة : ... كل الناس .. ؟
- توحيد : .. كل الناس ..
- فاطمة : الرجالة .. والسيدات .. ( لحظة ) ..
- والأطفال ..
- توحيد : أيوه .. بيلمهم انفعال واحد .. قدامهم هدف واحد .. واضح .. محدد .. مسيرة .. مسيرة شايلة مواد البناء ..
- ( صت للحظات يسود المرح )
- فاطمة : أنا مش عاوزه' اتسرع وأقول فكرتك عاجباني .. ( تلتفت لنوح ) .. لكن حقيقي يا نوح ..
- الفكرة دى جديرة بالدراسة ..
- نوح : طبعاً .. ليكى حق .. ما هو انت مش بتدافعى عن البلد دلوقت .. انت بتدافعى عن طفلك ..
- فاطمة : من حقى .. ومن حق الآخرين .. ( تحتد قليلاً ) .. انت متصور البلد أيه .. مباني وشوارع ومصانع .. البلد هى طفلى وأطفال الآخرين ..
- نوح : أنا مش داخل فى مناظرة .. لتعريف كلمة بلد معنى أيه .. أنا ما عنديش وقت للابحاث الفلسفية .. كل اللى عندى .. لا كلام فى غير عملية نوح .. ولا كلمة .. اعتبروا الموضوع منتهى ..
- ( طرقت عال على الباب ... مضطرب وعصبى )

نوح

: أدخل ...

( يدخل سكرتير الجلسة ... مرحوبا ، مفزوعا ...  
وكان الجبل كانت في أعقابها )

نوح

: فلان ..

سكرتير الجلسة : ( ساقاه لا تقويان على حمله ) .. أنا اتكلمت  
يا استاذ نوح .. اتكلمت ( بالتهيار كامل ) ..  
قلت كل حاجة .. اتفضل اقلنى .. يا الله ..  
موتنى حالا .. والا حانتحر ..  
نوح : اهدا .. تمالك أعصابك .. اتفضل أقعد ..

سكرتير الجلسة

: ( يجلس منهارا .. يتكلم وهو يكاد يبكي ) ..  
أنا قلت لك من الاول .. حذرتك .. رفضت  
تسمعننى .. قلت لك أنا ما عرفش احتفظ  
بسر .. ولا سألت فى .. قلت لك أنا باتكلم  
وأنا نايم .. مفيش فايدة ..

نوح

اهدأ بس .. اهدأ .. خد سيجارة ..  
( يعطيه سيجارة ) .. هاتى كباية ليوم  
يا فاطمة ...

( فاطمة تهرع إلى ترموس صغير ، تصب منه كوب  
ليمون ... وتقدمه لسكرتير الجلسة الذى يشربه دفعة  
واحدة )

نوح

: ايه بقى اللى حصل بالظبط ...

سكرتير الجلسة : ولا حاجة .. اتكلمت .. مش مهم التفاصيل  
.. النتيجة انى اتكلمت .. النتيجة انى  
حاكون السبب فى فشل خطتك كلها ..

نوح

: برضه هاووز اعرف التفاصيل .. اهدا  
واحكيلى ....

( يجلب نفسا من الميخانة ... يبدأ فى امصادة . رباطه  
جأشه بالتدريج ... )

**سكرتير الجلسة :** أنا كنت خايف من نفثى جدا .. كنت خايف  
لا تطلع منى كلمة كده والا كده فى اى قعده ..  
ولذلك بطلت قعاد على القهاوى .. قطعتم  
صلتى بكل اصدقائى .. خفت احسن اتكلم  
قدام مراتى .. طلقته .. قلت اسكن  
بعيد عن البلد .. اسكن بعيد عن اى حد ..  
( ينتابه الانفعال مرة اخرى ) انت السبب  
فى كده يا استاذ نوح .. أنا حذرتك .. وقلت  
لك بلاش أنا ...

توحيد

: يا عزيزى .. اهدا .. تماسك .. جايز  
نعرف نتدارك المسألة .. وبعدين .

**سكرتير الجلسة :** مراتى خدت العيال وراحت تعيش مع ابوها ..  
وأنا سبت الشقة ..

فاطمة

: ليه ؟ ..

**سكرتير الجلسة :** أنا ساكن فى آخر دور .. السطوح فوق منى  
على طول .. خفت حد يحط لى مايكرو فون  
فوق السطوح .. يسجل لى وأنا نائم .

فاطمة

: المايكرو فون جايسجل لك من فوق السطوح ..؟

**سكرتير الجلسة :** حصلت لواحد صاحبى .. برضه كان ساكن  
فى آخر دور .. اتضح ان فيه مايكرو فونات  
بتجيب على بعد ستة متر مبانى ..

نوح

: طبعا سبت الشقة .. وسكنت فى أول دور ..

- سكرتير الجلسة : لا ... سكنت تحت الأرض ..  
نوح : تحت الأرض .. ؟  
سكرتير الجلسة : أيوه .. لى نص فدان جنب قليب .. وكان  
عندى قرشين .. بنيت شقة بالاسمنت  
المسليح على بعد عشرة أمتار من سطح الأرض  
.. أودة وصالة ودورة مياه ...  
نوح : كويس قوى .. وبعدين ..  
توحيد : لا .. مش كويس قوى .. سلوك زى ده  
يخلي أجهزة الأمن كلها تشك فى تصرفاتك ..  
المسألة كان علاجها أبسط من كده ... حته  
بلاستر صغيرة تلزقها على بقلك . لما تيجى  
تنام ..  
سكرتير الجلسة : عملتها وكنت حاتخنى .. أنا عندى لحميه  
.. وما عرفش اتنفس من مناخىرى .  
نوح : كمل .. وبعدين ..  
سكرتير الجلسة : وفى مرة وأنا مروح البيت ..  
توحيد : قصدك وانت مروح الخندق ..  
سكرتير الجلسة : سميه زى مانت عاوز ..  
فاطمة : سيبوه يتكلم يا جماعة ..  
سكرتير الجلسة : لقيت عربية شفرولية طويلة فخمة جدا ..  
واقفة قدام ال ... قدام البيت وفيها واحد  
افندى أنيق .. لابس نضارة سودة كبيرة ..  
قال لى أهلا يا استاذ فلان .. قلت له ..  
أهلا وسهلا .. قال لى أنا زميلك فى المحافظة  
.. وكنت جاي من اسكندرية وقلت أحود  
أشرب عندك شاي .. وأريح الموتور شوية ..  
توحيد : شفته قبل كده ؟ ..

سكرتير الجلسة : لا .. بسن قال لى إنه يعرفنى من زمان ..

وأنه كان معايا فى الدراسة .. كان زميلى فى

الجامعة ..

وافتكرته ؟ ..

نوح

سكرتير الجلسة : ... حاولت افتكره .. لكن على آخر لحظة

.. واحنا نازلين السلام سوا .. افكرت

انى ما دخلتش الجامعة ..

ده انت كنت مضطرب جدا ..

فاطمة

سكرتير الجلسة : كنت خايف قوى .. يا مدام ..

من إيه .. ؟ ..

نوح

سكرتير الجلسة : دش من حاجة معينة يا استاذ نوح .. انا

خايف على طول ..

وبعدين ..

توحيد

سكرتير الجلسة : نزل معايا .. عملت له الشاى .. قعد

يتمشى فى الأودة .. ويبص فى الكتب اللى

عندى .. ويبص تحت السرير .. دخل دورة

المياه .. كان واضح أنه بيدور على حاجة ..

وبعدين .. ؟ ..

نوح

سكرتير الجلسة : بعد ما شربنا الشاى .. قال لى باقول إيه

.. ماتيجى نروح أى كازينو ناخد فنجان

قهوة .. قلت له فرصة ثانية أصر انى أروح

معه .. وقعد يلح .. واتكسفت منه ..

ورحت معاه ..

توحيد

: يعنى إيه اتكسفت منه ؟ .. قال لك إيه

بالظبط .. ؟ ..

سكرتير الجلسة : أبدا قال لى تعالى نتردش فى أيام الجامعة

.. أيام الشقاوة .. خدنى فى العريية ..

طلعنا على كازينو في الهرم .. خدنا القهوة  
وقعدنا ندرش ..

**فاطمة** : تدرشوا في آيه ؟ .. انت مش بتقول انك  
مادخلتش الجامعة ..

**سكرتير الجلسة** : هو اللي كان بيتكلم في أيام الجامعة .. انسا  
الكلمت في أيام الشقاوة .. وفي الآخر خالص  
.. قال لي يا راجل بلاش العبط اللي انت  
عامله ده .. أرجع لمراك وأولادك وأصدقائك  
.. انت خايف من آيه ؟ .. مخبي آيه .. ؟  
.. مش عملية نوح .. والا فيه حاجة ثانية ؟  
.. هو قال لي كده وأنا اترعشت ركبى سابت  
.. سألته .. آيه اللي عرفك بعملية نوح ..  
قال لي انت ... انت اكلت وانت نايم ..  
سألته .. وعرفت ازاي .. ؟ المايكروفونات  
بتجيب على بعد ستة متر مبانى .. وأنا  
ساكن على بعد اثنا عشر متر .. قال لي ..  
آخر دفعة وصلت لنا بتجيب على بعد  
خمسة عشر متر .. ( يهتق صوته باليكاه )  
.. انت المسئول يا استاذ نوح .. أنا حذرتك  
.. وقلت لك .. انت اللي أصريت ..

**نوح توحيد** : طب اهدا .. اهدا ..  
: عزيزي أنا عاوز أؤكد لك انك مش انت اللي  
أغشيت السر ده .. وما اعتقدش حتى أفك  
اكلت وانت نايم ..

**سكرتير الجلبة توحيد** : آمال عرفوا ازاي ؟  
: المسألة ببساطة أن ده سر صحيح .. بس  
مش سر بيننا .. ده سر بين الخمسة  
وثلاثين مليون ..  
( اخفاء تدريجي للاضائة )





## المشهد الثاني

(قاعة المجلس الشعبي .. سكرتير الجلسة في مكانه ...  
نوح يدخل ويتبادل الجديك مع السكرتير .. قبل أن  
يلتحظ مكانه على المنصة)

نوح : ظهرت النتيجة .. ؟  
سكرتير الجلسة : ظهرت .. وكل الناجحين أبلغوا بميعاد  
الاجتماع ..

نوح : المجلس القديم .. نجح منه حد ؟  
سكرتير الجلسة : حاشوف دلوقت بنفيسك يا فندم ..  
( يدخل مدير الاحتفالات ... يبدو على نوح الامتياح )  
ولكنه ينتصب ابتسامة )

نوح : أهلا ... ألف مبروك ..  
مدير الاحتفالات : أهلا بك يا فندم .. الله يبارك فيك ..  
نوح : الظاهر عندك قاعدة شعبية متينة ...  
مدير الاحتفالات : انا بانجح في الانتخابات يا فندم .. من أيام  
هيئة التحرير ...

نوح : أسمعنى ...  
مدير الاحتفالات : ( يتنسم ابتسامة لزجة ) .. أصل وشي  
سمح ..

( يواصل التحديق في نوح بنفس الابتسامة الزجة ...  
وكأنها يتجدها .. يبدأ الآخرون في الدخول بهدوء ...

يتخلون أما كنهم .. إنهم نفس الوجوه .. نفس أعضاء  
المجلس القديم .. نوح وقد استولت عليه الدهشة الشديدة  
والانزعاج .. يمالك نفسه ويحاول جاهدا أن يبدو طبيعيا

نوح : ما كنتش عارف أنكم بتتمتعوا بثقة الناس  
للدرجة دى .. ؟

احدهم : أدبك عرفت ..

نوح : ( يفحص الموجودين بنظرة سريعة فيكتشف

غياب توحيد ) .. أمال فين المهندس

توحيد .. ؟

مدير الأمن : للأسف سقط .. خد صوت واحد ..

اللى هو صوته ..

ليه .. ؟

مدير الاحتفالات : حايكون ليه .. شخص رزل .. وما حدش

بيثق فيه

نوح : ... ده كلام غير صحيح .. توحيد شخص

أهل لكل ثقة .. وفى الحالة دى أنا مضطر

أراجع الانتخابات بنفسى .. حاراجع التذاكر

والنتيجة ... وكل حاجة ..

( يلغز توحيد زعمه صندوق صغير )

توحيد : حائلاتى النتيجة سليمة .. ما حصلش اى

تزوير فى الانتخابات .. أنا فعلا ما خدتش

الا صوتى ..

نوح : أراى .. ؟

توحيد : فيه الفين صوت .. كنت ضامنهم فى جيبى

.. كل الناس لللى شغالين فى الإدارة

الهندسية ... بيتقوا فى ويبحبونى .

: راحت فين الاصوات دى .. ؟ ..

: راحت اسكندرية والقيوم .. الأستاذ مدير

الاحتفالات عمل رحلة أربعة أيام للإدارة

الهندسية .. يومين في اسكندرية .. ويومين

في القيوم .. بتلاين قرش .. يا بلاش ..

: يا باشمهندس ... أنا ما قبلش التعريف بي

... وأرفض كلامك الملىء بسوء الظن ..

الرحلة دى مقررة من خمس شهور ..

ومستعد أجيّب لحضرتك محضر لجنة

الاحتفالات اللى عملت الرحلة دى ...

: عزيزى أنت عبقرى .. أنا عارفك كويس ..

أنت تقدر تجيب فواتير بحفلات استقبال

عملتها لنابليون ..

: أنا احتج .. وباطلب من السيد رئيس

المجلس ...

: مفيش دأى .. أنا مش جاي اشتكى .. ولا

أحتج على اللى حصل .. ولا أنا حريص اتى

أقعد مع حضراتكم في مكان واحد .. أنا جاي

أسلم الرسومات الهندسية دى .. يمكن

تنفعكم .. السلام عليكم ..

( يستدير في طريقه للخارج )

: استنى يا توحيد .. ما تخرجش .. انت

عضو المجلس بالتعيين .. أنا عينتك ..

: حضرتك حاتلفى الديموقراطية بكلمة عشان

المهندس توحيد .. ؟

: اذن ما كانش فيه دأى للانتخابات ..

توحيد

مدير الاحتفالات

توحيد

بلو

مدير الخزنة

مدير التعليم

مدير الصحة

آه بقي .. بالمره .. وحضرتك تعين اللى عايز  
تعيّنه .....

نوح

الالفين شخص دول .. لو كانوا موجودين ..  
كانوا انتخبوه ..

مدير المواصلات

الديموقراطية ما فيهاش كلمة لو كانوا ..  
الناس دول لو كانوا بيحبوه ومؤمنين بيه  
صحيح .. كانوا يحرسوا أنهم يتواجدوا في  
مصر يوم الانتخابات .. مهما كانت اغراءات  
الرحلة ..

توحيد

( يواجههم ) .. ما تتخوش قوى كده ..  
( يلتفت لنوح ) .. متشكر قوى يا استاذ  
نوح .. كبريائى يجملى ارفض اقعد مع  
ناس مش عاوزنى ..  
( يستدير ليخرج )

نوح

( يبدو عليه الاجهاد الشديد ) .. استنى  
يا توحيد ..

توحيد

( يتوقف ) .. اذا احتجتنى حضرتك ..  
في أى ساعة من ساعات الليل والنهار ..  
أدينى تليفون .. انا تحت أمرك ..

نوح

استنى يا توحيد .. أرجوك ماتمشيش ..  
أنا محتاجك جانبى ..

( يبدو عليه الامياء الشديد ... كما لو كان على وشك  
الاغماء .. يرفع كفه إلى جيبه .. يحاول التشبث بالمنصة

يتهاوى على الأرض ببطء .. توحيد يسرع إليه ،  
يتلقاه بين ذراعيه .. سكرتير الجلسة يترك مكانه ويخفف  
لمساعدته.. الموجودون يجلسون بلا مبالاة .. وبلا حراك )  
: دكتور يا جماعة .. دكتور .. دكتور ..

توحيد

( ينظرون له في صمت .. يشيحون بوجوههم بعيدا  
عنه .. تخفت الاضاء .. )



### المشهد الثالث

( في كابينة القيادة على سفينة نوح ، نوح مرتليا  
ملابس قبطان بحرى يقف أمام جهاز ارسال صغير ،  
ويتحدث فى المايكروفون ... مع بداية المشهد نسمع  
لأصوات سرينات بحرية )

نوح

: من قائد « عملية نوح » الى أجهزة القيادة فى نوح  
واحد ونوح اثنين ونوح ثلاثة . تمت عملية  
نوح بنجاح .. اشكركم .. خدوا الاتجاه  
الصحيح .. الانزال حايكون بعد أربعة  
وعشرين ساعة .. فى الموقع اللى تم تحديده  
من قبل طبقا للخطة الموضوعة .. الماكينات  
فى أقصى قوتها .. بأقصى سرعة .. الجزء الثانى  
من « عملية نوح » يبدأ تنفيذه منذ هذه  
اللحظة .. بند أ .. اشارات لاسلكية للعالم كله  
بمهمتنا .. بند ب .. اشارة لاسلكية .. لكل  
المصريين المبدعين فى كل المجالات ، الذين  
يعيشون فى الخارج .. صيغة الاشارة  
بسيطة جدا وواضحة .. نحن فى حاجة اليكم  
... الجزء الجاى من كلامى خاص بركاب  
السفن الثلاثة ... وصلنى بيهم لو  
سمحت .. ( صوت تكة ) .. شكرا ..

( هذا الجزء يتباع من سماعات صالة المسرح  
وبأعلى درجة للصوت ) .. من قائد عملية  
الانقاذ الى السادة الركاب .. ايها السادة  
.. يا أحسن العناصر في مصر .. لقد اختاركم  
الأقدار لتصنعوا ما لم يصنعه أحد من قبل  
.. أن مهمتكم شاقة وصعبة .. ولم يذكر  
لنا التاريخ مهمة أكثر منها صعوبة ومشقة  
.. الا اننى أومن أنكم قادرون على اتمامها ..  
أتمنى لكم التوفيق وشكرا ...

( يقلل جهاز اللاسلكى ويستدير مبتعدا .. فى اللحظة التى  
يبدل فيها مدير الاحتفالات )

**مدير الاحتفالات :** ياسلام يا أستاذ نوح .. كلمتين .. بس هم  
.. القائد العظيم لما يتكلم .. يقول سطرين  
بس .. بس سطرين يحركوا الجماد .. الف  
ميرولد يا أستاذ نوح ..

**نوح :** ما شفتش الدكتور فاطمة .. ؟

**مدير الاحتفالات :** أنا شفتها فى الطريق وأكبة عربية .. بس لما  
جينا أسكندرية ... اختفت منى فى  
الزحمة ..

**نوح :** ما حدث شافها وهى بتركب .. ؟

**مدير الاحتفالات :** مؤكد ركبت .. حانعمل حصر للركاب قووا ..  
بس فيه موضوع المجلس كلفنى أنى اتكلم معاك  
فيه ..

**نوح :** مفيش وقت للكلام .. أقروا الخطة كويس ..  
معقول حساب كل حاجة ..

- مدير الاحتفالات : أصل الجماعة لهم رأى ثانى ..  
 نوح : رأى ثانى فى آيه .. ؟  
 مدير الاحتفالات : يقولوا يعنى .. ( نوح ينظر له بحدة  
 فيتعلم ) .. العملية ... وعلى آيه ..  
 أجيبهم يشرحوا لك .. ( يصيح ) ..  
 اتفضلوا يا أساتذة ..  
 ( يدخل أعضاء المجلس )
- نوح : آيوه يا حضرات .. فيه حاجة .. ؟  
 مدير التكوين : استاذ نوح .. احنا فكرنا كويس فى الموضوع  
 .. ولقينا أن حكاية البناء دى مستحيلة ..  
 نوح : مستحيلة ببقى آيه .. ؟  
 مدير الصحة : يبقى جنون لما نزل فى الصحراء وما عندناش  
 شيكارة أسمنت واحدة ..  
 مدير التعليم : حتى كمية الأكل والمأية اللى معنا مش كفاية ..  
 نوح : أنا وجهت نداءات دلوقت ..  
 مدير الاحتفالات : الحاجات دى ما تنفعش فيها النداءات .. احنا  
 فكرنا كويس وقررنا ..  
 نوح : قررتم ... ؟  
 مدير الخزنة : آيه ؟ .. مستكتر علينا أن احنا نقرر .. ؟  
 مدير الثقافة : مش كفاية هيايينك بتصرف لواحدك من  
 الأول ..
- مدير الاحتفالات : اسمعنا يس يا استاذ نوح .. مش جازر رأينا  
 يطلع صح ..  
 نوح : اتفضلوا ...  
 مدير الإسكان : احنا دلوقت نطلع على كبدنا ..  
 ( تتوأن كلماتهم يحاصرون بها نوح الذى يكاد يصق )





.....  
: هي فين دى .. يص من الشباك .. احنا  
طالعين على الصحرا ..

نوح : هي دلوقت صحرا .. بس انا شايفها .. اقدر  
المسها بأيدي .. شايف مصانعها وشوارعها  
.. شايف اطفالها يلعبوا في الجنائين  
مليانين صحة .. المسالة محتاجة شوية  
خيال ..

.....  
: آهو هو ده اللي احنا بنعترض عليه .. الخيال  
.. احنا ناس واقعيين جدا ..

مدير الاحتفالات : خلاص بقى يا جماعة .. احنا عملنا اللي  
طينا وارضينا ضميرنا .. نقول له بقى ..  
( يلتفت لنوح ) .. استاذ نوح .. احنا  
ماتقبحوش نسيب عملية زى دى تفشل  
يسيب واحد خيالى زى حضرتك ...  
المجلس خد قرار بمزلك .. وتعيين اكبر  
الاعضاء سنا .. والقرار بيطلع استنسل ..

( نوح يتحرك .. في نفس اللحظة ، يهجم عليه اثنان  
يطلقانه من الخلف .. يثلاثن حركته تماما .. المفاجأة  
تعدد لسانه .. في نفس اللحظة يتقدم مدير الاحتفالات  
من مايكروفون جهاز الاسلكي )

مدير الاحتفالات : بيان من القائد الجديد « لعملية نوح » ..  
للسادة ركاب سفن الإنقاذ نوح واحد ونوح

الذين ونوح ثلاثة .. تقرر تغيير وجهتنا ..  
سننطلق الآن الراكب الثلاثة متجهة الى ..  
( نوح يصرخ مغالما وهو يحاول عبثا التخلص من  
القائمين عليه )

نوح : احنا طالعين على مصر .. ( يصرخ فيهم ) ..  
اطلعوا على مصر ... يا اغبيا ...  
مدير الاحتفالات : ( بقسوة باردة هادئا تماما ) .. سكتوا  
الافندى ده ..

( أحدهم يضربه على رأسه بكعب مسدس .. يتهاوى نوح  
على الأرض ببطء شديد جدا ... تبدو حركة نوح  
والمجموعة حوله .. كأنما تقدمها آلة عرض سينما  
بطيء .. تخفت الاضاءة بنفس إيقاع الحركة ... عندما  
يصل إلى الأرض .. يكون المسرح قد أظلم تماما ...  
ثم تنزل ... )

الستار

\*\*\*



## الفصل الثالث



## الشهد الأول

( غرفة في مستشفى ... نوح يرتدى بطلوثا و جاكته  
بيجاما ... يخلع جاكته البيجاما ويتناول قميصا يأخذ  
في ارتدائه .. تمثل فاطمة )

- |  |       |
|--|-------|
| : آيه يا نوح .. آيه اللى بتعمله .. ؟ ..    | فاطمة |
| : بالبس .. زهقت من السرير ..               | نوح   |
| : الدكتور مصر انك تقعد كمان يومين ..       | فاطمة |
| : اتفضل البس البيجاما ونام على السرير ..   | نوح   |
| : خلاص .. أنا استريحتم بما فيه الكفاية ..  | فاطمة |
| : الدكتور هو اللى يقرر ده ..               | نوح   |
| : حاستريح فى البيت .. لو قعدت هنا حاتمب .. | نوح   |
| : أكثر .. مش عارف أنام هنا .. هنا          |       |
| : باتمعرض لكوابيس قظيمة .. بالحلم أحلام    |       |
| : مخيفة ..                                 |       |
| : عيبك انك مكابر .. مش عاوزه تعترف انك     | فاطمة |
| : مصاب بانهيار عصبى ... نتيجة للاجهاد ..   |       |
| : نتيجة للشغل ليل ونهار .. المطلوب انك     |       |
| : تستريح كمان يومين ..                     |       |
| : حاضر ..                                  | نوح   |
| : حاضر آيه .. بتاخذنى على قد عقلى .. ؟     | فاطمة |
| : خلاص يا فاطمة .. مش حاجهد نفسى ..        | نوح   |

حاشتغل بطريقة مريحة ( يرفع سماعة  
التليفون ) .. أدنى البوابة لو سمحت ..  
من فضلك يا مدموزيل .. فيه واحد  
حاييجي يمسأل على دلوقت .. خليه يطلع  
على طول ..

: مين ده .. ؟

: مديز الأمن ..

: غاوزك في أيه .. ؟

: أنا اللي نعاوزه ..

: الدكتور مانع الزيارة يا نوح ..

: أنا اتفاهمت معاه .. سمح لي استقبل زوار

.. ببس بدون انفعال .. بدون توتر ..

: أفهم من كده ان فيه حد ثاني حاييجي

يزورك .. ؟ ..

: اينزه .. أعضاء المجلس ..

: بتقول بدون توتر .. ؟ ..

: أرجوكي يا فاطمة هي حياتي كده .. الراحة

بالنسبة لي ترف .. ويمكن تكون جريمة ..

أنا فاضي استريح .. ؟

: آمال فاضي لايه ؟ .. تعيا وتنهار .. ؟ ..

: ممكن تكلمني وانت نايم .. ؟

: دي ممكن ...

: ويمكن اللي ييجي يزورك ... تتكلم معاه

وانت نايم ؟

: ممكن .. أهو ..

( يرقط على السرير )

فاطمة

نوح

فاطمة

نوح

فاطمة

نوح

فاطمة

نوح

فاطمة

نوح

فاطمة

نوح

فاطمة

نوح

فاطمة

نوح

فاطمة

نوح

فاطمة

نوح



فاطمة : وإيه الفايضة .. حالتكم .. وتنعمل ..

نوح : ماتخافيش يا فاطمة .. خلاص .. أنا بقيت  
كويس فعلا ..  
( طرقات على الباب )

نوح : أدخل ..

( يدخل مدير الأمن ومعه باقة من الورد ، تصافحه  
فاطمة وتأخذ منه باقة الورد ، يصافح نوح الذي يهم  
بالهوض من سريره )

مدير الأمن : خليك مستريح يا أستاذ نوح .. ماتتعبش  
نفسك ..

( فاطمة تقدم له مقدا في مواجهة نوح .. بالطبع نوح  
ينسى نفسه خلال محادثته مع مدير الأمن ويترك السرير )

نوح : سيادة اللوا ... أنا سعيد جدا بزيارتك ..  
مدير الأمن : قالوا لى فى البيت أنك اتصلت بى مرتين ..  
خير .. ؟

نوح : خير انشاء الله .. الموضوع باختصار انى  
عاوز اكلم حضرتك فى الكشفوف اللى عملتها  
فى المجلس ..

مدير الأمن : تحت أمرك ..  
نوح : أنا مش بالكلمك بصفتك عضو المجلس .. أنا  
بالكلمك بصفتك مسئول الأمن فى المحافظة ..

مدير الأمن : باختاطب فيك ضميرك الوظيفى .. كرجل أمن  
تهمة بلده .. مش مصر تهمةك برضه .. ؟  
: ومين ماتهموش مصر .. ؟

- نوح** : اتفقنا .. قطعا يا سيادة اللوا .. فيه عندهم  
في أجهزة الأمن المختلفة .. كشوفات فيها  
اسماء احسن العناصر في البلد ..
- مدير الأمن** : نعمل بيها إيه يا أستاذ نوح ؟ .. أنا ممكن  
في ربع ساعة أجيب لك كشوف فيها أسماء  
أسوأ العناصر في البلد .. لكن حكاية العناصر  
الكويسة دي مالناش دعوى بيها .. وعمرها  
ما كانت مطلوبة ..
- نوح** : أنا فاهم غير كده .. اللي أعرفه .. انهم لما  
بييجوا يعينوا حد في منصب بياخدوا رأيكم  
.. ده كويس .. والا لا ؟ ..
- مدير الأمن** : السؤال ما بيقاش كده .. السؤال بيبقى ..  
ده وحش والا لا ... يعني هل عنده سوابق  
.. ؟ .. متورط في أشياء مريبة .. ؟ ..
- نوح** : وكفاءته في العمل .. ؟ ..
- مدير الأمن** : واحنا مالنا ومال كفاءته .. احنا مهمتنا  
نعرف سوابقه ..
- نوح** : ولما أحب أعرف كفاءة واحد في الشغل ..  
أسأل مين .. ؟ .. أسأل الاتحاد  
الاشتراكي .. ؟ ..
- مدير الأمن** : لو حضرتك بعث تسال الاتحاد الاشتراكي ..  
حايحول الجواب علينا ..
- نوح** : ( وقد بدأ يتوتر ) .. ياسلام .. ياسلام ..  
حايحول الجواب عليكم ..
- فاطمة** : ( تهتته ) .. بدون توتر يا نوح ..
- نوح** : حاضر .. ( لمدير الأمن ) .. حصلت قبل كده  
الحكاية دي .. ؟ ..

- مدير الامن : كثير .. الاتحاد الاشتراكي مرة عمل حاجة  
اسمها التنظيم الطليعى .. اى واحد يدخل  
التنظيم ده كان لازم يسألنا عنه ..
- نوح : فلو كان سىء .. ما يدخلش ..
- مدير الامن : مش قاعدة . والله دى مسألة محيرة يا أستاذ  
نوح .. أنا نفسى مش فاهمها .. ساعات  
نقول لهم على واحد انه وحش ..
- نوح : يقوموا يرفدوه ..
- مدير الامن : لا .. يصعدوه وجايز يرفدوناه ..
- نوح : ليه .. ؟ ..
- مدير الامن : مانا باقول لحضرتك انها مسألة محيرة ..
- نوح : تقصد مسألة مفزعة .. ( وقد بدأ يفقد  
أعصابه ) .. يعنى يا سادة اللوا .. نقدر  
نقول باختصار شديد أن احنا بقى لنا عشرين  
سنة .. عندنا أجهزة نعرف بيها أسوأ  
العناصر .. لكن ما عندناش أجهزة تقول لنا  
مين احسن العناصر ..
- فاطمة : مش كده يا نوح .. مش كده ..
- نوح : ( صائحا فيها ) اسكتى يا فاطمة .. ( يتمالك  
نفسه ) .. آسف يا فاطمة . آسف ..  
أرجوكى اعدلىنى ..
- مدير الامن : أستاذ نوح .. حقيقى يابنى انت بتصعب على  
.. مليون مثل ووطنية .. لكن منعهم الخبرة  
يابنى المسائل سايحة .. أنا ساعات يجى لى  
تقريرين عن شخص واحد فى اليوم ..  
تقرير بيقول أنه ممتاز جدا .. وتقرير بيقول

انه سيء جدا .. انا امبارح جبالى تقرير هن  
واحد انه من اتباع سعد زغلول ..

نوح  
مدير الامن

: دى مسالة خطيرة جدا ..  
: حضرتك بتجسد المسالة بطريقة مبالغ فيها ..  
دى مسالة عادية جدا .

نوح

: لا .. دى مسالة خطيرة فعلا .. معنى كده  
ان خطتى بتتهز من اساسها .. عملية نوح  
كلها مبنية على اختيار احسن العناصر ..  
: مفيش حقيقة مطلقة .. كل حاجة نسيبه ..  
الكشوف اللى معاك فيها احسن العناصر  
نسيبا ..

مدير الامن

: هو ده الفرق بينى وبينكم .. انا بادور على  
المطلق .. انا بادور على احسن مصر فى  
الدنيا .. وانتم عاوزين تعملوا اى حاجة ..  
: انا آسف جدا .. كان بودى اساعدك ..  
لكن ..

نوح

مدير الامن

: لكن ايه .. ! .. اهى هى لكن دى .. لكن  
دى اللى حاتموتنى ..

فاطمة

: ( تتدخل مهددة للموقف ) .. ممكن نغير  
الموضوع .. ؟ .. يستحسن نتكلم فى حاجة  
مبهجة .. نام يا نوح .. نام على السرير ..

نوح

: حاضر .. حانتكلم فى حاجة مبهجة ..  
حانصب القعدة دلوقت ونقول نكت ..  
يا الله يا سيادة اللواء .. قل لنا نكته ..  
أراهنك لو عرفتى تفرى الموضوع ...  
اتحداكى لو عرفتى تتكلمى عن حاجة مبهجة ..

يا الله .. كلمينى عن أغنية مبهجة .. كلمينى  
عن مسرحية عظيمة ... احكى لنا عن فيلم  
جميل .. يا الله .. كلمينى عن مستقبلنا ..  
حاضر .. مش حانفعل .. مش حانوتر ..  
حاهدا .. وأدى الاقراص اللى بتهدى  
( يتلّع عدة اقراص دفعة واحدة ) .. حاخذ  
المسائل ببساطة ... كل المسائل حاخذها  
ببساطة .. وحنام ( يقفز فوق السرير ) ..  
أهو .. وحانقطى .. أهو .. ( يجذب عليه  
الغطاء .. يختفى تماما تحت الغطاء ..  
تمر لحظات ) .. أنا بنام فعلا دلوقت ..  
( يكشف الغطاء عن وجهه ويتكلم بهدوء  
شديد .. ) .. نوم هادى .. عميق  
.. كما الاطفال .. ( يبدأ صوته فى  
الارتفاع .. ) يا الله احكوا لى حواديث عشان  
أنام .. هاتولى كل الادوية المنومة اللى فى  
الدنيا .. عشان أنام ... ( يغطى وجهه ثم  
يكشفه بعد لحظة ) .. بعد ما عرفت أن بعد  
عشرين سنة .. كنا مهتمين بس بأسوأ  
العناصر .. وبأعالم .. كانوا أسوأ العناصر  
والا لا ... سيادة اللؤاء يقول أن المسائل  
كانت نسيحة .. ومع ذلك مطلوب منى أنام  
.. حاضر .. حنام .. يا الله يانوم ... ( صائحا )  
يا الله يا نوم ( يصرخ كالطائر الجريح ) ..  
عاوز أنام يا ناس ..  
: اهدا يا نوح .. اهدا .. لو استمررت بالشكل  
ده ... حاجيب لك الدكتور ..

فاطمة

نوح

: اندهيله .. هاتيه فورا .. حا قول له  
الحكاية دى .. أما اشوف حايعرف ينام  
ازاى .. هاتولى دكاكرة البلد كلها ..  
عشان اقول لهم الحكاية دى .. اراهنك  
لوحد فيهم عرف ينام .. دول ناس بيتشغلوا  
علينا احنا بس .. عاوزينا احنا بس اللى نهدا  
وننام ..

مدير الأمن

: انا آسف يا مدام .. دى حالتبه لا تسمح  
بالزيارة فعلا ..

فاطمة

: نوح ...

نوح

: فاطمة .. انا سليم جدا .. متمالك نفسى  
تماما .. وفاهم جدا .. وهى دى الكارثة  
.. انا باهرج بس .. طلع فى مخى انى اهرج  
شوية .. عاوز أزعق واقول اى حاجة ..  
عاوز أهبل يا ناس .. هو ده علاجى  
الوحيد .. انى أهبل .. أنا آخذ كل حاجة  
جد .. والجد حا يقتلنى ..

مدير الأمن

: أستاذن أنا يا مدام ..

نوح

: أنا متشكر قوى يا سيادة اللوا .. وآسف اذا  
كنت أزعجتك ..

مدير الأمن

: لا أبدا .. ربنا يكون فى عونك ..

مدير الأمن

(فاطمة توصله إلى الباب .. قبل أن يخرج يكلمها همسا)  
: هو عيبه أنه ما بياخدش المسائل ببساطة ..  
أمال لو قرأ التقارير اللى اتكتبت فيه كان عمل  
أيه .. ؟

فاطمة

: يقولوا عليه آيه .. ؟ ..

- مدير الأمن : عندك من تهريب العملة وطالع .. آخر تقرير  
فيهم يقول أنه عميل لعشر دول أجنبية ..  
سلام عليكم يا بنتي ..  
( يخرج مدير الأمن )
- نوح : ( هادئا تماما ) ... ولعى لى سيجارة يا  
فاطمة ..  
( تشعل له سيجارة وتتأمله بهدوء )
- نوح : فاطمة . اطمنى ..  
فاطمة : على إيه .. ؟
- نوح : ما حدثش فى ميلتنا أصيب بالجنون ..  
ما تخافيش على .. أنا أترادى أقوى من  
مقلى .. أنا هادى .. وحافضل هادى على  
طول ..
- فاطمة : ياريت ..  
نوح : حاتشوفى ..
- .. ( جرس التليفون .. يمد يده ليرفع الساعة ولكنها  
تلتقطها قبله )
- فاطمة : يا مدموزيل .. الزيارة ممنوعة .. أنا حانزل  
لهم حالا ..  
( تضع الساعة )
- نوح : هم مين .. ؟ ..  
فاطمة : أعضاء المجلس ..
- نوح : يا شخية خليههم ييجوا .. خلاص أنا هديت  
.. مش حاكلهم فى حاجة ..
- فاطمة : حضرتك كنت حاتتجن من شوية .. لما  
كلمت واحد فيهم .. واحد بس .. حايحصل  
إيه لما ييجوا كلهم .. ؟

- نوح** : ولا حاجة .. خلاص .. الأزمة عدت .. كمان مش حاكلهم فى الشغل .. أرجوكى يا فاطمة خليهم يتفضلوا .. مفيش داهى يحسوا أن حالتى سيئة .. لازم يشعروا أن كل شىء على ما يرام .
- فاطمة** : لو فقدت أعصابك .. حانادى الدكتور فوراً .. أو حانسحب ..
- نوح** : مش حافقد أعصابى .. أنا عندى أعصاب عشان أفقدها ..
- فاطمة** : ( ترفع سماعة التليفون وتتردد لحظة ) .. الو .. خليهم يتفضلوا يا مدموزيل .. ( تضع السماعة )
- ( يدخل الجميع ، نلاحظ أنهم يرتدون كرافتات سوداء ، كل منهم يحمل باقة ورد صغيرة ، يحيون فاطمة بهزة رأس وابتسامة .. يرصون باقات الورد حوله على السرير ، يحيطونه بالورد تماماً .. تمر لحظات صمت طويلة )
- نوح** : لو سمحتوا شيلوا الورد من حوالى .. أنا لسه ما متش .. ( يرفعون باقات الورد ويناولونها لفاطمة التى تكومها فى ركن )
- ..... : حمد الله على سلامتك يا أستاذ نوح ..
- ..... : اهى المرة دى تعلمك أنك تاخذ اللسائل ببساطة ..
- ..... : يا راجل ... صحتك بالدينا ..
- ..... : متهيأله أنه حا يصلح الكون لواحد ..



- ..... : روق كده وما تخافش .. ما تفكرش فى الشغل .. وراك رجالة ..
- فاطمة : لو سمحتم يا جماعة .. الدكتور سامح بالزيارة على أساس أنها تكون هادية .. اى كلام فى الشغل خطر على صحته ..
- نوح : ( بحزم ) .. فاطمة ارجوكى .. أنا ماحبش حد يتدخل فى شغلى .. مهما كانت درجة صلته بى ..
- فاطمة : حاضر .. أنا آسفة .. تحب اسيب الأودة كمان .. ؟
- نوح : لا .. ماحبش .. وآسف .. ( لأعضاء المجلس الذين يقفون محيطين به ) .. أنا متشكر يا جماعة للزيارة دى .. وعاوز انتهر الفرصة دى عشان اتكلم فى مسألة الكشوف ..
- الجميع : تانى ... ؟
- نوح : بصراحة يا جماعة .. مش قادر أقنع ضميرى .. أن الاسماء اللى انتم حطيتوها .. هى أجسن الاسماء فى البلد ..
- الجميع : نشيل اسمينا عشان تستريح .. ؟
- نوح : لا .. مش باطالبكم بكده .. احنا بشر .. ولا يمكن حانجب الآخرين اكتر مابنحب نفسنا .. أنا موافق على اسميكم .. بس عاوزين نتكلم بصراحة ..
- الجميع : اتفضل ..
- نوح : قلعب ورقنا على المكشوف .. مفيش داعى للمجاملة .. حضراتكم مش أحسن العناصر فى البلد .. كده على بلاطة .. وانتم عارفين ده كويس .. ومع ذلك .. أوعدكم بشرفى

انكم اول ناس حايتم انقاذكم .. بس على شرط .. تختاورلى عشرة آلاف واحد ابقى واثق قدام ضميرى انهم احسن العناصر فى مصر .. ايه رايبكم فى الصفقة دى .. ؟ .. انا انقذكم وانتم تنقلوا عملية نوح .. أنا باقدم لكم حياتكم رشوة ..

: أنا عن نفسى أرفض هذا الكلام .. أرفض  
أى كلام عن نراهننا ..

....

: خلاص .. حضرتك تروح فى داهية ..  
( للجميع ) .. وانتم .. ؟

نوح

: استاذ نوح .. لو وافقنا على الصفقة  
بتاعتك دى .. يبقى معناها أن الكشف الى  
عملناها مش سليمة ..

....

: تحب نحلف لك بشرفنا أنها سليمة ..

....

: ثم حضرتك ازاي تعرض علينا رشوة .. ؟  
: مش وقته يا جماعة .. القضية دى تبقى  
نثريها بعدين ..

....

: الظاهر الانهيار العصبى اثر على تفكيره ..  
: أنا مش عارف الدولة ازاي تكلفه بمسألة  
خطيرة زى دى ..

: فكروا فى اللي باقوله .. فكروا كويس ..  
والا اشتغل لوحدى بطريقة ثانية ..  
: انت حر اشتغل لواحدك ..

نوح

: ما تفكروش انى عاجز .. أنا أقدر اشتغل  
.. وفى الحالة دى .. خاطريتها على دماغ  
أبوكم .. لسه قدامكم فرصة تفكروا فى  
اللى باقوله ..

نوح

.... : استاذ نوح .. احنا هنا مجرد زوار وحضرتك  
مجرد مريض .. وعلى هذا الاساس حانقوت  
الكلام اللى قلته .. لكن بعد كده لينا حساب  
تانى ..

نوح : بتهددنى يعنى .. ؟ .. خلاص .. ؟ ..  
مش عارف اتفاهم معاكم ؟ مقيش بيننا لفظة  
مشتركة .. ؟ طب الحل ايه .. ؟ .. اقع  
فى عرضكم .. ؟ .. انزل من على السرير  
وأبوس رجلكم واحد .. واحد عشسان  
تشتغلوا بما يرضى الله .. وبما يرضى  
البلد .. ؟

مدير الاحتفالات : يا الله بينا يا جماعة ..

( يدخل توحيد فى نفس اللحظة اللى همون فيها بالحركة ..  
توحيد يحمل معه كية هائلة من ورق الجرائد )

نوح : أهلا يا توحيد .. انت فين يا توحيد .. ؟ ..  
انت سايب الجماعة دول يلتهمونى .. ؟ ..  
كلمتك فى البيت امبارح ما كنتش موجود ..  
كنت باعزى ..

توحيد

: البقية فى حياتك .. مين مات .. ؟

نوح

: واحد تعرفه .. مدير الاسكان ..

توحيد

: ( هامسا لنفسه جانبا ) .. هانت .. فاضل

نوح

تسعة آلاف وتسعمائة وتسعين .. ( لهم )

.. ما قلتوش ليه يا جماعة .. البقية فى

حياتكم ..

: انت اديتنا فرصة نكلمك ..

: آه صحيح .. ده كلهم لابسين كرافتات

نوح

سودا .. ايه اللى معاك ده .. جرايد السنّة

دى .. ؟

توحيد : لا .. دى جرايد النهاردة .. دول الثلاث

جرايد ..

مدير الاحتفالات : ( برقة شديدة وبلهوجة كانما يريد الخلاص

من الموقف ) .. يالله بينا يا جماعة ..

عشان نسيبهم يدردشوا .. سلامتك يا

أستاذ نوح .. يالله بقى سيب السرير ..

عشان نوضب لك حفلة حلوة قوى .. حلاوة

السلامة .

( الجميع يسرعون في اتجاه الباب )

توحيد : ( يقف بجسمه أمام الباب يعترضهم ) ..

استنوا يا جماعة .. استنوا .. مش

تستنوا لما نتكلم شوية عن المرحوم .. عن

مآثر الفقييد .. مش تدوفا فرصة نذكر

محاسن موتانا .. ( لنوح ) .. الجرايد

النهاردة . كل جورنال طالع ٢٢٠ مائتين

وعشرين صفحة .

: ملاحق .. ؟ ..

توحيد : لا .. صفحة الوفيات لوحدها ٢١٢ صفحة

مائتين واثناشر صفحة ..

: يا خبر .. حصل كارثة ؟ . -

: فعلا ..

: بأخرة والا طيارة .. ؟

: ما قلت لك ... مدير الاسكان ( يمسك

بجريدة ويقسرها ) .. توفى المهندس فلان

الفلانى مدير الاسكان .. جوز بنت الدكتور

فلان الفلانى مدير المنطقة الطبية . ابن خالة

الاستاذ فلان الفلانى مدير التعليم وابن عم

فلان الفلانى مدير الاحتفالات .. وجوز بنت  
خال الشيخ فلان الفلانى .. مدير الأوقاف  
وابن عم حرم كل من مدير الخزنة العمومية ..  
وقريب كل من السادة الآتية أسماؤهم ...  
عشرة آلاف اسم .. العشرة آلاف اسم دول  
.. حاتلاقيهم هم العشرة آلاف اسم اللى  
عندك .. لو حضرتك كنت رحت تعزى امبارح  
بالليل فى جامع عمر مكرم .. يا اما كنت  
حاتموت من الضحك .. يا اما كنت حاتموت  
من الغم .. صيوان وفيه يا استاذ عشرة آلاف  
شخص كلهم بيمثلوا عائلة فلان الفلانى ..  
العشرة آلاف اللى كانوا فى الصيوان .. هم  
اللى اسمهم منشور فى الجرايد النهاردة ..  
هم العشرة آلاف اللى المفروض فيهم انهم  
بيمثلوا روح مصر .. طلعت من العزا على  
صديق لى متخصص فى التاريخ المصرى  
القديم ... سألته عن عائلة فلان الفلانى ..  
انضح أن جدهم الكبير كان رئيس الحكومة  
أيام الملك ميناء .. الأسرة دى استلمت الجهاز  
الادارى بمجرد ما ميناء وحد الوجهين ..  
( لنوح ) .. مبروك يا عزيزى .. هذه هى  
عملية نوح .. بدأت من أجل انقاذ روح  
مصر .. تحولت لعملية انقاذ جهاز الموظفين  
اللى بيعكموا البلد .. واخيرا بكتشف انها  
انتهت بانقاذ أسرة واحدة .. عائلة واحدة  
بتنحل فى وبرنا من آلاف السنين ..  
( يهاجم نوح بشدة ) ... عندك كلام تدافع

بينه عن خطتك .. عندك كلام تدافع به عن  
عملية نوح الفاشلة .. الساذجة ..  
: ( تصيح فيه ) .. يا باشمهندس . انت  
بتتكلم مع انسان مريض ..  
: انا باتكلم مع انسان مسئول .. مش عاوز  
يفهم .. كان لازم يعرف من الاول انه لا  
توجد في مصر وسيلة لمعرفة أحسن عناصرها  
.. مفيش تنظيمات كفيلة بكدة .. مش  
حانعرف مين الكويس الا اذا الناس اتحركت  
في اتجاه هدف ما .. خطتى كانت بسيطة  
وسهلة .. نتجه شرقا لارضنا .. ونشتغل ..  
هنا العناصر الكويسة بتبان ..

فاطمة

توحيد

: خطتى سليمة يا توحيد .. عمليتى ناجحة  
ماية فى المايبة .. الناس دول هم اللى  
وحشين ..

نوح

: الناس دول كويسين قوى .. ومش حاتلاتى  
أحسن منهم .. الكارثة أن عقولهم ما  
حصلهاش اى تدريب على النزاهة والابداع ..  
عقولهم متمرنة ازاي تحافظ على مناصبها ..  
ازاي تتجنب غضب الحاكم .. دول مساكين  
يا استاذ نوح .. ما بيشوفوش ربع متر  
حواليهم ... واقعين جوه نفسهم .. هات  
اى واحد فيهم واسأله .. ما تعرفش دكتور  
كويس .. ؟ .. هو حايعرف مينين .. ؟ ..  
حايسأله مراته . مراته حاتدله على الدكتور  
ابراهيم جوز بنت عمته .. افرض ما بئالش  
مراته .. حايسأل زميله اللى قاعد جانبه ..

توحيد

ما يعرفش هو راخر حايصال خالته حاتدله  
 على الدكتور فوزى جوز بنت خالتها وفى  
 الحالة دى حايتهين الدكتور ابراهيم  
 أو الدكتور فوزى ... والاثنين من عائلة  
 فلان الفلانى .. لكن صدقنى هم ما يعرفوش  
 انهم من عائلة واحدة .. بيكتشفوها بس لما  
 حد يموت لهم . ويتقابلوا فى العزا .. أستاذ  
 نوح للمرة الأخيرة .. والا حاضرب نفسى  
 بالنار . قدامك دلوقت .. باسم اشرف  
 وأجمل الاشياء .. أرجوك .. الغى عملية نوح .  
 ( توحيد يلهث بعد أن يذل مجهودا عنيفا فى القاء كلمته ..  
 الصمت يسود المسرح فى انتظار ما سيقوله نوح .. نوح  
 ينهض من على السرير وينزل الى الأرض .. يفتح  
 الحقيبة الكبيرة التى لا تفارقه .. يخرج منها مطروفا  
 أصفرا كبيرا .. )

**نوح**

: اذا الواحد خسر كل شىء .. على الأقل ما  
 يخسرش شجاعته .. فعلا التجربة أثبتت  
 أن عملية نوح غير قابلة للتحقيق .. أنا حاروح  
 اعرض الموضوع كله على رؤسائى .. حاروح  
 اعرض فشلى ..

**مدير الاحتفالات** : ( بهدوء شديد . أنه هنا شخصية مختلفة  
 تماما ... حازم ، بارد .. يوحى بأنه  
 يستطيع أن يسود أى موقف اذا أراد .. )  
 مفيش داعى يا أستاذ نوح .. احنا اللي  
 حانتولى المسألة دى ..

**نوح**

: مسألة إيه ؟ ..  
**مدير الاحتفالات** : مسألة عرض فشلك على رؤسائك ..

**نوح** : انت بتتكلم بصفتك ايه يا أستاذ .. ؟ ..  
**مدير الاحتفالات** : أنا معايا تفويض من المجلس كله انى اتكلم  
باسمه .. وبطل بقى نعمة تعالى اللى  
بتتكلم بيها ..

**فاطمة** : من فضلكم .. ممكن ننهى المسألة دى  
دلوقت ..

**مدير الاحتفالات** : مدام من فضلك .. احنا سئعنا المعاملة اللى  
بتتعامل بيها ..

..... : ده متصور أن مغيث وطنى فى البلد الا هو ..  
..... : الاستاذ نوح مصاب بجنون العظمة .. وأنا  
مش باقول أى كلام ... أنا طبيب ومسئول  
عن كلامى ..

..... : أنا مش عارف ازاى المسئولين يكلفوا واحد  
مهزوز بعملية خطيرة زى دى .. ؟

..... : احنا ناس عندنا ضمير .. ولينا تاريخ .. وما  
نقدرش نسمح بضياح روح مصر بسببه ..

**مدير الاحتفالات** : مش عاوزين كلام كثير من فضلكم .. أستاذ  
نوح .. تقرير المستشفى أرسلت منه نسخة  
للقوميسيون الطبى .. فيه قرار من  
القوميسيون الطبى أن حضرتك لا تؤتمن  
على اتخاذ قرارات لها صفة الاهمية ..

**توحيد** : ما هى العائلة فى كل حجة ..

**مدير الاحتفالات** : ( لتوحيد بصراصة ) .. حسابى معاك بعدين  
يا باشمهندس ... ( لنوح ) .. لو سمحت  
سلمنا كل أوراق عملية نوح .. احنا اللى  
حائنفد العملية ..



نوح

( يتشبث بالظرف باحساس غريزي بالخوف )

... عملية نوح مش مجرد عملية فاشلة ..  
دى عملية خاطئة . سيعرتب عليها تدمير روح  
مصر .. دى جريمة ..

مدير الاحتفالات

اديننا الظرف .. ما تضطرناش نلجأ للقوة ..  
( يتوزعون فوراً ، إثنان منهم يمدان مكان الخروج ..  
والآخرون يتقدمون فى اتجاه نوح )

نوح

يحدق فى وجه مدير الاحتفالات ..  
دى اسوا حفلة عملتها فى حياتك .. حادفك  
ثمناها غالى ..

مدير الاحتفالات

ه .. لو خرجت من المستشفى أبقي دفعتنى  
ثمناها .. أدبنى الظرف يا أستاذ نوح ..  
مغيش دامى للمقاومة .. خليك واقعى ..  
حاتبهدل انت ومراتك ..  
( صوت الانذار ينبعث من الحقيقة .. مفاجىء .. حاد ..  
متقطع .. مفزع )

فاطمة

: الانذار ...

( الجميع يتسمرون فى أماكنهم وقد الجبهم المفاجأة ..  
فاطمة تسرع الحقيقة .. تخرج ساعة التليفون )

فاطمة

: ( تدارى اضطرابها بشجاعة هادئة ) .. أيوه

يا دكتور .. أنا فاطمة .. أيوه .. نوح  
موجود .. والانذار وصل لنا .. اطمن ..  
أخبارك آيه .. ؟؟ ( تلتفت لنوح ) .. قدامنا  
أربعة وعشرين ساعة .. ( تحديق فى لاشئ )  
وهي تنقل ما يقوله الدكتور ) .. قدامه  
دقائق .. بدأ الموج يعلى .. بتعمل آيه يا  
دكتور .. ؟ .. ( تحاول أن تبدو مرحة ) ..

بتدخن البايب .. ( لنوح ) بيسمع مزيجة ..  
 مش تسمعى معاك يا دكتور .. السيمفونية  
 الخامسة .. مرس يا دكتور .. فعلا باحبها  
 .. انت لسه فاكى ؟ .. حاضر يا دكتور  
 .. ( لنوح ) .. عاوزنى اهتف وراه .. حاضر  
 يا دكتور .. حاهتف وراك .. ( تصمت  
 لحظة ثم تهتف بصوت خافت ) .. تحيا مصر  
 .. تحيا مصر .. ( تكاد نسمع معها صوت  
 الأمواج ) .. ألو .. ألو ..

( تفع الباعة وهى تدارى حزنها بنبالة ... لازال نوح  
 قابضا على الطرف بشدة )

مدير الاحتفالات : ( نفاقة ياخذ شكلا حماسيا جادا ، عليه

مسحة من التوسل ) .. يا نوح يا عظيم ..  
 يا أعظم من أنجبته الأرض .. انت أكبر منا  
 كلنا .. أكبر من كل تصرفاتنا الصغيرة ..  
 قلبك كبير . يغفر كل حاجة .. احنا تحت  
 امرك فى كل شىء .. يالله ابتدى .. كل لحظة  
 حاتناخرها حاتفرق فيها قطعة من مصر ..  
 مصر .. كل شىء فى حياتك وفى حياتنا ..  
 آلاف السنين من التاريخ المكتوب بتبص لك  
 دلوقت الزمن نفسه بيستنى أول خطوة منك  
 .. يالله يا استاذ نوح .. افتح الطرف ..  
 وطلع أوامر التشغيل والكشوف .. وبلغ  
 الجهات اللى حاتنقل الناس اسكندرية ..

: ناس مين ؟ .. قصدك عائلة فلان الفلانى  
 .. ؟ .. كما كنت عملية نوح .. مفيش  
 عملية نوح ..

نوح

## نوح

: يا مجنون ...

(مدير الاحتفالات يتناول شيئا ثقيلا من حل المائدة ويهجم -  
على نوح ليأخذ منه المظروف .. الجميع يساعدونه .. توحيد  
يتدخل هو وفاطمة للدفاع عنه ، يتمكن من الإفلات ولكن  
بعد أن يصاب بضربة على رأسه .. يترنح .. لا زال ممسكا  
بالمظروف ..)

## توحيد

: أجرى يا نوح .. أجرى .. أجرى ..

(يجرى نوح هاربا)

: وراه ..

: أمسكوه وخدوا منه الظرف ..

: أقتلوه ...

(توحيد وفاطمة يصدان الباب بمسدسيهما للحظات إلى أن  
يتغلب عليهما أعضاء المجلس ويجرون خارجين .. توحيد  
وافطمة وحدهما الآن ..)

## فاطمة

: لو طلع على البيت حاييمسكوه .. تفتكر  
حايروح فين .. ؟

## توحيد

: أنا عاجز عن التفكير في أى شيء .. ما مرفش  
ليه في اللحظة دى بافتكر أبويا .. الله يرحمه  
كان راجل بسيط جدا .. ما دخلش  
مدارس ... ساعات كنت أروح لـه في  
مشكلة ما لهاش حل .. كان دايمما يقول  
لى .. أرمى حملك على ربنا .. يالله بينا  
يا مدام ..  
(يجرجان .. تخفت الاضائة)

## المشهد الأخير

( صالة معيشة في منزل ديفى يوحى بمز.قديم .. نافذة  
كبيزة ويجوارها كرسى مداد طويل .. نوح في وسط  
الغرفة .. يجلس على الأرض في منتصف المرح وقد  
أشعل النار في اناء صغير .. يلقي في النار بأوراق  
فولسكاب )

## نوح

: كله في النار .. كله لازم يولع .. مش حاخلى  
حد .. دكاترة .. مهندسين .. محامين ..  
صحافيين .. كتّاب .. فنانيين .. لازم  
أخلص على كل عائلة فلان الفلانى .. هم  
فاكرين انهم حايفلبونى .. يالله .. كله ..  
ومش حايجصل لمصر حاجة .. عمر ما  
حايجصل لها حاجة .. يجى الطوفان ..  
يجى البحر .. تعالى يا بحر .. تعالى  
يا طوفان .. حاتعمل ايه يعنى .. حاتكون  
زى مين .. ؟ . الفرس والا الرومنا ؟ ..  
حاتكون زى الفرنساويين والا زى الانجليز ..  
والا زى الاتراك .. والا زى اليهود .. والا  
حتى زى اخوانا المصريين اللى سجنونا  
وعذبونا .. كله يجى يولع .. هنا ..  
وحاستنى مصر .. كله يفرق .. حايفضل  
واحد وواحدة .. لازم حايفضل واحد  
وواحدة .. فوق جبل .. حايمملوها .. في  
حثة عالية.قوى .. ولو ما فضلش حد ..  
مش حايجصل حاجة .. الكوينين اللى  
مشيوا حايجى منهم واحد وواحدة ..

حايعلوها .. واحد وواحدة كويسين ..  
 هم .. أما أنا كنت حاغلط حتة غلطة ..  
 عشرة آلاف ايه .. ؟ .. ده احنا كتير قوى  
 .. ده احنا كلنا كويسين ... خلاص ..  
 أنا قضيت على عائلة فلان الفلانى ..  
 ولعبت فيهم ..

( يتحسس مؤخره رأسه ثم ينظر لكفه )

كله ولع تحول لرماد ..

( ينفض وهو يترنح فى طريقه للكرسى .. يصل إليه ..  
 ساقاه لا تقويان على حمله .. يركع ويستند إلى مسند  
 الكرسى .. يذفن وجهه بين ساعديه للحظات ... الأداء هنا  
 هامس ورقيق ، يشع بالحزن النبيل ... أى محاولة  
 للأداء الانفعالى أو الأداء الزاعق ستنال من جلال المشهد  
 وتجعله أكثر وطأة . ان مشهد نهاية نوح لابد أن يقدم  
 فى إطار من النبيل والرقه الهامسة )

ماما آنا جيت يا ماما .. هاتى لى البيجاما :

... وحضرى لى الغدا ...

( يتأمل الأرض حوله )

ماما أنا آسف .. دى جه على الأرض ..  
 لكن البحر حاييجى .. حاي نصف كل حاجة  
 ماما أنا بردان .. بردان جدا .. فطينى يا  
 ماما .. شيلينى يا ماما .. شيلينى هب ..  
 طلعينى على الكيرسى ده .. عاوز أشوف  
 النيل ... كنت حاغلط غلطة كبيرة .. لكن  
 أنا خلصت عليهم كلهم .. ماما اعملى لى  
 عروسة ورق .. أنا عيان ... اعملى لى

نوح

عروسة ورق وخرميهها .. وولهيها .. أنا  
ولعت فيهم كلمهم .

( يتشبث بالمقعد )

.. ماما غطيني .. لسه بردان .. خديني  
في صدرك .. دفيني ..

( أنها لحظات النهاية ، جسمه ينحسر من على جانب  
المقعد ويبدأ في السقوط ببطء في اللحظة التي يدخل فيها  
توحيد وفاطمة )

: نوح ...

فاطمة

( يسرعان اليه ، يحملانه برفق ويشمانه على المقعد ..

توحيد ينقل بصره بين الأرض ومؤخرة رأسه )

: ( هامسا لفاطمة ) .. أصابته خطيرة .. نرف

توحيد

كثير ..

: ( هامسا ) .. بردان .. غطيني ..

نوح

( فاطمة تصرخ لغطاء قريب وتضمه عليه )

: نوح .. نوح .. أنا فاطمة يا نوح .. ومعيا

توحيد

توحيد ..

: ازيك يا واد يا رزل ؟ .. عرفتوا بيت العائلة

نوح

ازاي ..

: بندور عليك بقى لنا عشر ساعات .. وأخيرا

توحيد

أدركت أنك لازم تيجي المكان اللي اتولدت

فيه .. نوح .. أنا حاجب دكتور فورا ..

: متأخر يا توحيد ..

نوح

: حاسين بابه ..

فاطمة

: الشيء الوحيد اللي ما حسيتش بيه طول

نوح

همري .. بالسلام .. أنا هادي جدا ..

هدوء جميل ولذيد .. ( يسرح ببصره عبر  
 النافذة ) .. النيل جميل قوى يا ولاد ..  
 بلاش نضيع وقت .. فيه ظرف صغير فى  
 جيبى الشمال .. فيه كل حاجة تهك ...  
 أسماء وعناوين وأرقام تليفونات .. روح  
 لهم .. وأشرح خطتك .. فيه وقت كفاية  
 عشان تنفذوا عملية .. عملية توحيد ..  
 حاسمها عملية نوح ..

توحيد  
 نوح

عارف يا توحيد .. ساعات باحسن انك جزء  
 منى .. عارف انت مين يا توحيد .. ؟ ..  
 انت نوح .. انت الجزء الرزل اللى فى ...  
 انفصل وأصبح على هيئة انسان .. يالله  
 يا توحيد .. يالله يا فاطمة ..

فاطمة  
 نوح

أنا حاستنى معاك يا نوح ..  
 تستنى تعمل أبه .. أنا عارف انها  
 دقائق بالنسبة لى ..

فاطمة  
 نوح

أنا حرة فى حياتى ..  
 واللى فى بطنك .. ؟ .. هى دى غلطتى يا  
 فاطمة .. لما حسيت انى جبر فى حياة  
 الآخرين .. ( لتوحيد ) .. توحيد .. أبنى ،  
 حاطلمه أبه ؟

توحيد

حاطليه يحب المزىكة والشعر ... ويفهم فى  
 التاريخ .. حاطليه يعرف يضحك من قلبه  
 .. حاطلمه ازاى يحب كل حاجة حواله ..  
 : ( يصمت للحظات ) .. أنا عاوزه يطلع ذيك  
 يا توحيد .. رزل ... عاوزه يعترف يقول  
 لا .. شغلى البيك اب يا فاطمة ..  
 ( فاطمة تسرع لبيك أب قديم )

نوح

## نوح

: ولع لى سيجارة يا توحيد .. أنا مش بردان  
دلوقت .. أنا دفيان جدا ..

( توحيد يشعل سيجارة .. يقترب بها من فم نوح ..  
شيء ما فى هنيهة يحمله يتراجع بها .. يمسك السيجارة  
ويفركها بين كفيه فى ألم .. تأتى فاطمة وتنتظر لنوح ..  
تتمالك نفسها فى نبالة .. ترفع الغطاء على رأسه ..  
يأخذها توحيد من ذراعيها ويتجه بها للخارج .. يتوقفان  
فى كادر ثابت .. ترتفع الموسيقى .. سيمفونية النصر  
ليبيتهوفن ... قوية .. هادئة .. بأقصى طاقة لسماعات  
المسرح .. تخفت الانضاء .. تنزل .....

( الستار )



## للمؤلف

- ♦ الناس التي في السما الثامنة
- ♦ ولا الطفاريث الرزق
- ♦ الراجل التي مسحت هي الملايكة
- ♦ ببر القمح
- ♦ اغنية على الممر
- ♦ البوفية
- ♦ حدث في عزبة الورد
- ♦ أنت التي قتلت الوحش
- ♦ عفاريث مصر الجديدة
- ♦ الملوك يدخلون القرية

## أعمال بمصرة عن المسرح الفرنسي

- ♦ طبيخ الملايكة
- ♦ حب لا ينتهي
- ♦ مدرسة المشاغبين
- ♦ العيال الطيبين
- ♦ روعة القلب

دار « نافع » للطباعة - ت ٩٠٠١١٨

---

رقم الايداع ١٩٧٤/٥٣٥٩

## داد الثقافة الجديدة

تقدم قريبا بالاضافة الى مطبوعاتها الاقتصادية والسياسية مجموعة قوية من أحدث الأعمال الأدبية العربية والأجنبية

## مسرحیات

♦ رسول قرية تميرة لبحث مسائل الحرب والسلام

تأليف محمود دياب

اعداد نجیب سرور

♦ ملك الشحاتين

للمرحوم ميخائيل رومان

## • العرض الحالي

للكاتب الكوي خوزه ترانا

## ♦ ليلة القتل

ترجمة فتحى العشرى

## روایات

لغالب هلسا

## • الخواص

## لجمال الفيطاني

### • وقائع حارة الزعفراني

للکاتب الامیر کی جیمس دروت

♦ السيد

ترجمة صنع الله إبراهيم

شماره

♦ دیوان احمد فؤاد نجم

لعبد الصبور منير

♦ ما تيسر من سورة العنكبوت

للشاعرة السوفيتية الطليعية

حقی

بلا أحمد ولینا

میں

ترجمة د . رفيق الصبيان

## • سیناریو فیلم زد

سيناريو شوقي عبد الحكيم ،

• شفيقة ومتولى

سید عیسیٰ

♦. الفيلم بين الفكر وشباك التذاكر للناقد السوفيتي كاراجانوف



« على سالم يخدعكم ، أنه لا يكتب الكوميديا الضاحكة ولكن يقدم التراجيديا بلا دموع » ... د. على الراعي

الاسم : نوح محمد على

المهمة : انقاذ مصر من الفرق

كانت خطته محكمة وجريئة ، وعندما وصل الى مرحلة التنفيذ ، تحول الأمر كله الى ملهاة ، او لعلها مأساة ....

